

محمود السعدني الاعمال المسرحية الكاملة



الجزء الأول

- عزبة بني يوتي
- سرمدية سوا حفرة منصور
- بين الهند بين
- سرمدية سوا حفرة منصور
- النصابين
- سرمدية سوا حفرة منصور
- الأوزنس
- سرمدية سوا حفرة منصور

<http://arabicivilization2.blogspot.com>

الهيئة المصرية العامة للكتاب



الأعمال المسرحية للكاملية

محمود السعدني

الجزء الأول

□ النصائين

سرمية من ثلاثة فصول



النصابين

سرعية من ثلاثة ضوود

الفصل الأول

•• الافتتاحية

•• المنظر

مساحة تتوسط ربع أمير الجيوش على جانبي الساحة تبدو عتسش صفيح وعتسش قش ومسجد متهدم - خلف المئذنة وعلى البعد يبدو القصر الملكي - على يسار الساحة التي تتوسط الربع وبالقرب من جدار عتيق تقف عربة يد عليها كوز شاي صفيح ووايور غاز وعدة اكواب وثلاثة جوز - الى جوار العربة دكة خشبية وكراسى قش والى جوار الكراسى عربة كارو مقلوبة - خلف عربة الشاي يقف رمضان القهوجى صامتا فى ثياب مهلهلة على يمين الساحة بيت قديم على بابه رسوم سانجة لجمال وقطار سكة حديد وطيارة - فوق البواب يافطة مكتوب عليها (أم عنان مطربة الفنون الشعبية) ، فى مقدمة المسرح يقف ثلاثة اشخاص امامهم صندوق صابون كبير فارغ يعرضون عليه لعبة الثلاث ورقات - بينما يقف بعض المارة يتفرجون ويلعبون معهم ، نسمع خارج المسرح صوت المعلم رضوان مجلجلا - فيفزع لاعبو - الثلاث ورقات ويصرخ ابو سريع رئيس فريق النصابين لاعبي الثلاث ورقات (خبر أسود، البوليس يا وله) ثم يحملون الصندوق وأوراق الكوتشينه

ويهرب الجميع - يدخل المعلم رضوان ومعه الشاويش عبد
الرحيم ..

* * *

رضوان : وعنها يا عم رحنا لسعادة البيه .. مدير .. البوليس
انما ايه ؟

• راجل طيب تحطه على الجرح بيرد •

الشاويش : يا سلام ، انت متقوللى عليه ، دنا خدمت معاه خمس
سنين ، أيامها كان لسه متتش فى الداخلية ، انما الحق
ابن ناس طيبين •

رضوان : يا ميت حلاوة على دا راجل يا شاويش عبد الرحيم أيديه
تقول بتنقط عسل نحل ، وشه أحمر زى - القطيفة ،
لما يضحك من غير مؤاخذة ، الضحكة تنور فى وشه زى
الكلوب •

كبارة : أمال يامعلم رضوان ، دا كله من فضل الله •

الشاويش : (محتجا) .. بتقول ايه يا واد ، مش عاجبك الكلام
ولا ايه ؟

رضوان : يا راجل ما تدقش على كلامه ، حاكم دا صنّف فقرى
يستاهل الحرق •

كبارة : طب ويتشتم ليه بقى دلوقتى يا معلم رضوان ؟

رضوان : مانت لسانك زى الفرقلة طول النهار ما بيطلش أيوه
وشه أحمر من فضل الله ، عاوز أمال وش البيه الطيب
يبقى ، زى وشك الأسود ده •

كبارة : انا راجل غلبان وفقير يا معلم رضوان •

الشاويش : انت غلبان انت ، دانت تغلب بلد ..

رضوان : طب والله العظيم انت وشك أسود ومقعدد من أفعالك
السودة أمال انت فاهم ايه ؟ ما هو سبحانه وتعالى
بيدى كل حى على قد عمله قلبه أبيض يبقى وشه أبيض ..
• قلبه أسود يبقى وشه زى وشك كده •

كبارة : (مستهزئا) طب ما الخواجات وشهم أحمر كلهم ،
يبقى دا برضه من فضل الله ؟

رضوان : (بهم بخلع حدائه) قوم يا أخى فز وانت لسانك زى
العقرب كده .

كبارة : (بجرى مفزوعا) هو احنا يعنى مانتكلمش ولا ايه يعنى
احنا بقى ما نتكلمش (بيتعد) . .

كاملة : واد يا كبارة يجيك نيله . . انت عليك عفريت اسمه
الصفيحة قوم فز ياللى تنقرص فى بطنك (تجرى خلفه
وهو بالصفيحة) .

ام عنان : (تظهر من الشباك) ما تبطلى خوتة دماغ يا وليسه
انت . .

كاملة : ايه ياختى دماغك وجعتك ياختى ما يحكمش انى واقنة
قدام بيتى . . قدام سرايتى .

ام عنان : قال واقفة قدام سرايتها دى سراية مجانين والنهى .

كاملة : ده من حرقتك . . من غيظك . . أيوه سرايتى . . سرايتى
غصب عن حبابى عنكى . . سرايتى يا بتاعة هشك
هشك . .

ام عنان : جتها خيبة السرايات اللى بالشكل ده (تدخل وتغلق
الشباك) .

(عبد الرحيم ورضوان)

عبد الرحيم : هيه ، وعملتوا ايه بقى مع البيه . .

رضوان : ابن حلال . . أقولك . . تعرف ع الباب بتاعه عساكر
أد ايه ، يفتحوا مدينة .

عبد الرحيم : انت متقوللى ، مانا عارف كل حاجة ، دنا خدمت معاه
خمس سنين كان لسه أيامها مفتش فى الداخلية . .

رضوان : وعز ايه اللى هو فيه يا أخى تصدق بالله ، المكتب اللى هو
قاعد فيه يطلع أد الربع كله ، مراوح ايه ، تصاوير ايه ،
كراسى ايه .

عبد الرحيم : أنت متقوللى ، دنا خدمت معاه خمس سنين كان لسه
مفتش فى الداخلية .

رضوان : يا سلام يا جدعان . . دا ربنا لما يدى واحد ، يديله صحيح
من غير حساب دا ربك كبير قوى .

الشاويش : انت هتقوللى ٠٠ دنا خدمت معاه خمس سنين كان لسه أيامها مفتش فى الداخلية .

رضوان : الغرض يا محترم ، الراجل قابلنا وقعد اتكلم معانا ، زى أنا وانت كده طب واللى خلق الخلق قام ولع لى السيجارة ، نفسه حلوة قوى ٠٠

الشاويش : انت هتقوللى ، دنا خدمت معاه خمس سنين .

رضوان : (مقاطعا) الغرض ، شربنا القهوة ولعننا السجائر واتكلمنا .

الشاويش اياك تكونوا رسيتموا على بر .

رضوان : قدمنا له الشكوى وكتبنا له ملتمس ، فضل البيه يسمع وهو ساكت ، يسمع وهو ساكت وفى الآخر قال كلمة واحدة
بس .

الشاويش : ودا كلمته يا معلم رضوان ما تنزلش الأرض .

رضوان : مغيش كلام ، راجل ابن أصول ، وأخر صلاح ، طب واللى خلق الخلق قام صلى الضمهر واحنا قاعدين ٠٠

الشاويش : هنيا لك يا عم ، مش طمنكم وقال مش هانهد .

رضوان : حلمك على ، هو دا زينا ، دا عالم الكلام عندهم بحساب ، قبل ما يقول الكلمة يوزنها فى ميزان الذهب ، تعرف قال ايه فى الآخر .

الشاويش : ايه ؟

رضوان : ولا يكون عندكو أى مشغولية ٠٠ احنا هانبحث الأمر .

الشاويش : لا دا احنا عاوزين الحلوة بقى .

رضوان : ازاي ؟

الشاويش : ازاي دا ايه ، يا راجل يا مبروك .

رضوان : صحيح والنبى يا شاويش عبد الرحيم !

الشاويش : بقولك اطمئن ، دنا ، اشتغلت معاه خمس سنين وعارفه كويس ٠٠ ما دام قالك هنبحث الأمر ، يبقي كل شىء تمام ، حاكم دى لغة ميرى احنا فاهمينها .

رضوان : لغة ميرى ازاي بقى من غير مؤاخذه ؟

الشاويش : حاكم عبارة هنبحث الأمر ، يعنى همنطوح المسألة .

رضوان : يا سلام بقى هنبحث الأمر ، يعنى همنطوح المسألة ٠٠

- الشواويش : بالظبط كده ، زى عبارة والبحث جارى .
- رضوان : لا هوه ماقالش جارى دى خالص .
- الشواويش : لا مانا بقولك يعنى ، حاكم لما ينقتل قتييل والا تتسرق
سريقة ، ابوليس يغلب ولا يعررش اساسها ، يقوم يقول
والبحث جارى ، والبحث جارى يعنى . . تحفظ القضية .
- رضوان : بقى كده ؟
- الشواويش : بالظبط . . ماهو البيه مادام قالك هنبحت الأمر ، يبسقى
هيمطوحوا المسألة .
- رضوان : الله ، أما دا يبقى حتىه دين حظم السما .
- الشواويش : وع العموم أنا متحرى الأمر كده من بعيد لبعيد ، وانشاء
الله هاتك أنا ع المسألة من ناحيتى .
- رضوان : كتر ألف خيرك يا شواويش عبد الرحيم (يضرب ايده فى
جيبه) ويخرج نقودا يدسها فى ايد الشواويش) .
- الشواويش : مالوش لزوم (يقترب كباره منهما مرة أخرى)
- رضوان : لا والله ، على النعمة ما تكسفننى أبدا .
- الشواويش : لا والله مالوش لزوم .
- رضوان : لا واللى خلق الخلق . .
- (يقترب كباره متلصصا)
- كبارة : ما تاخذ بقى يا شواويش عبد الرحيم ما تبقاش أمال لكع .
- الشواويش : بتقول ايه ياواد انت ؟
- كبارة : أنا قلت حاجة ، بقولك خد ، أهو كله من فضل الله .
- الشواويش : (وهو يتناول النقود) أمنت بالله ، عشان تعرف ان الراجل
اللى نيته سالكة ، ربنا يسلك سكتته .
- كبارة : لا والحمد لله سكتك سالكة خالص .
- الشواويش : طب سلامو عليكو .
- رضوان : بس ما تروحش وتقول عدولى ، خلينا نشوفك .
- الشواويش : انشاء الله ، سلامو عليكو .
- رضوان : مع السلامة يا شواويش (يجلس ويلتفت لكبارة) اذت
يا واد مش هتبطل الغلاسة بتاعتك دى .
- كبارة : وأنا عملت ايه بس يا معلم رضوان ؟

- **رضوان** : بقى احنا ما صدقنا ربنا هداهم والحمد لله .
- **كِبارة** : ولا هداهم ولا حاجة .
- **رضوان** : اذا كان البيه بنفسه طمنى .
- **كِبارة** : انت بتصدق الكلام ده .
- **رضوان** : قصدك ايه ؟
- **كِبارة** : أهل الحته مش هيسكتوا .
- **رضوان** : بيقروا مجانين ، احنا لازم نسمع كلام البيه .
- **كِبارة** : وان طلع البيه كلامه مش مظبوط .
- **رضوان** : مش ممكن أيدا ٠٠ دا وشه أحمر زى القطيفة .
- وايديه بتخر سمن بلدى من فضل الله عليه .
- **كِبارة** : بكرة تشوف يا معلم رضوان .
- **رضوان** : انت أصلك وش نكد ولسانك طويل ودا كله من فقرك ،
ما تقوم يا أخى تشوفلك شغله .
- **كِبارة** : ايدى على كتفك ، شوفلى شغله وأنا اشتغل .
- **رضوان** : ما تشتغل يا أخى أى حاجة مانتش زى كاملة .
- **كِبارة** : كاملة معانا كام باكو ، بتشتري فيهم وتبيع .
- **كاملة** : (تخرج من الباب) نعم ، دا مين اللى بينده على كاملة
معلم رضوان ، صباح الخير يا معلم .
- **رضوان** : صباح النور يا خالة كاملة .
- **كاملة** : لا ما تععبش نفسك يا خويا ٠٠ احنا مش بايعين ، والنبي
مانى بايعة ، سى حمدى القومندان قاللى ما تخافيش
يا كاملة مش هيهوده .
- **رضوان** : والله العظيم دا سعر ما حد فى الدنيا يديهولك .
- **كاملة** : يا معلم رضوان ما تقولش كده ، أبيع بخمستلاف جنيه .
- **رضوان** : وهمه الخمستلاف جنيه حاجة بسيطة ، حد معاه خمس
بواكى دلوقتى .
- **كاملة** : لا معانا يا خويا والحمد لله ، الفلوس معايا أهه ، خير
ربنا كثير .
- (تخرج من جيبتها عدة بواكى)
- **رضوان** : على كل انت حرة ، الفلوس جاهزة وتحت أمرك .

كاملسة : لا والنبي ، والنبي ومن نبا النبي نبى ما بيع ، ابيع سرايا
ياخواتى بخمستلاف جنيه والنبي مانى بايعه ٠٠ سر حمدى
القمندان قال مش هيهوده ٠

كبارة : (ضاحكا بهستيرية) سرايا آل الا سرايا (يكف عن
الضحك) طب والله عندها حق ٠ سرايا صفرا ما فيش
كلام ٠

رضوان : عمرك ما قلت حق غير الكلمة دى ٠

كيسارة : انا طراى عمري أقول الحق يا معلم رضوان ٠

رضوان : يا شيخ اتلقح ٠٠ انت لاقى تحلق ٠٠

كيسارة : وهية الحلاقة مالها ومال الحق يا معلم رضوان ٠

رضوان : يا واد اللى ربنا بيرضا عنهم بيديهم خير كثير ٠

كيسارة : طب ما الخواجا ليفى الخير عنده كثير ، ليفى اللى بيطلع

القرش بعشرة ، الفايطجى يبقى ربنا راضى عنه ٠

رضوان : (محرجا) على الحرام مانت فالبح طول عمرك ، خليك

ورا لسانك داهه وهو يوديك فى داهية انشاء الله ٠

كيسارة : (يهم وأتفا) داهية داهية اهى كلها محصلة بعضها ٠

رضوان : خد يا ولد رايح فين ٠

كيسارة : رايح أشوفلى بريزة أشرب شاي ٠

رضوان : أقعد أسقيك شاي ٠

كيسارة : دهنه ، يعنى مش عوايدك ٠

رضوان : يا واد أقعد بلاش غلبة

كيسارة : لا يا عم أنا رايح أشرب شاي ٠

رضوان : يا واد أقعد انا عاوزك (للجرسون) اعمل شاي يارمضان ٠

رمضان : حاضر يا معلم ٠

كيسارة : طب والنبي دى حكاية تتكتب فى الجرائين يا جدعان

(يجلس) ٠

عاوزنى فى ايه بقى ؟

رضوان : يا سلام ياد يا كبارة ، تعرف ياد يا كبارة ان كبارة

هنبحث الأمر زى عبارة البحث جارى الخالق الناطق ٠

كيسارة : انت بتتكلم جد يا معلم رضوان ٠

رضوان : اى وحياء النبى كده ، حاكم ياد يا كباره فيه لغة ميرى
ما يفهمهاش البهايم اللى زيك .

كباره : انت برضه هتليخ يا عم رضوان (يهم واقفا) طب والله
لسايب الحتة وماشى .

رضوان : (يجذبه عن ملابسه) يا واد اقعد ماتبقاش بيهيم .

كباره : سيب امال يا عم رضوان .

رضوان : اقعد لاديك على قفاك ، دا ماله زى الطور السودانى كده
(يجذبه نحو الأرض) بهزر معاك (للجرسون) هات شائى
يا رمضان .

رمضان : حاضر يا معلم رضوان .

رضوان : (يفتح علبه سجائر) خد سيجارة خد ، ولع (يشعل له
السيجارة) .

جلال : صباح الخير يا معلم رضوان .

رضوان : اهلا يا صباح الأنوار انت فين .

جلال : فين ايه ما انتاش عارف أنا فين - فى المعركة .

رضوان : معركة ايه كفا الله الشر .

جلال : معركة الحى .

رضوان : الله يكون فى عونك .

جلال : هه قوللى - عملتوا ايه مع مدير الأمن .

رضوان : كل خير انشاء الله .

جلال : شفت بقى جالك كلامى .

رضوان : البركة فى سيادة البيه مدير الأمن العام هو اللى قائلنا
حابث الأمر ودى فى اللغة الميرى زى البحث جارى ،
الخالق الناطق .

جلال : وايه اللغة الميرى دى بقى .

رضوان : عبارة هنبث الأمر ، الخالق الناطق هيه عبارة البحث
جارى .

جلال : يا خويا دا انت فاهم كل حاجة اهمه .

كباره : انت بتتكلم جد يا معلم رضوان .

رضوان : زى مابقولك كده ، بقى حاكم احنا اول ما رحنا عنده
اليه ، لقينا عنده عالم ملطوعة ع الباب ياقوة الله .
أمم ، من كل الملل ، انجليزى تلاقى . رومى تلاقى . وولف
تلاقى أى كده وحياة النبى ..

كبارة : ولطعوكم انتو كمان .

رضوان : يلطعنا ازاي يا واد . دا راجل ابن أصول ويصلى الوقت
بوقته تعرف .. من صلاحه يا واد يا كبارة . ايده دى
سمنية كده زى ما تكون بتخر السمن البلدى .

كبارة : (وهو يشفط من السيجارة) ووشه أحمر زى - القטיפية
من فضل الله مش كده .

رضوان : تمام يا واد يا كبارة الزيبية على جبهته متاكل حنة من
أورطه قعدنا ع الكراسى القטיפية تعرف ، من فضل ربنا
عليه ما فيش ولا كرسى قش فى المكتب . كل الكراسى
قطيفة .

كبارة : (وهو يشفط من السيجارة) انت بتتكلم جد يا معلم

رضوان : أى وحياة دا اليوم المفترج . قطيفة م الحلوة قوى .
وتعرف ساعة ما قام يصلى فرش سجادة عجمى معتبرة .
تعرف السجادة دى لوحديها - بتاع ألف جنيه .. آمال
يا أستاذ .. مش بقولك اللى يعيش يا ما يشوف واللى
يمشى يشوف أكثر .. طيب دا احنا علشان نروح نشوفه
مشينا مشوار ..

جسلال : معلهش ما مات حق ووراءه مطالب .

رضوان : الله يقطعه ابو طالب وسنينه اللى مارضى يبجى معانا
يا أستاذ كان ناقص نبوس رجله .

جسلال : أبو طالب مين .

رضوان : الراجل الذدل أبو كرش حمضان ده عنده ست بيوت فى
الحنة وقرصان على الدنيا حايهدوا الحنة كلها ومش
عاوز بيبز بقرش .. عارف خاف يروح معانا عند مدير
الأمن ليه .. ليكون الدخول بفلوس .. تقولش جنينة
حيوانات المغفل .

كبارة : هيه ، واداكو عقاد نافع يعنى ؟

رضوان : حكينا له الحكاية ، لأ الأول هو اتكلم كلمتين قال اسمعوا
يا رجالة بقى أنا مدير الأمن العام ومش عاوز أى درشة

تحصل وأنا موجود وخصوصا انتو ساكنين جنب القصر
الملكى • شوفوا انتوا عاوزين ايه • وأنا ماليش بركة
الا انتو •

كبارة : الله ، دا عارف المشكل بقى •

رضوان : امال ، دا عارف كل حاجة •• تصدق بالله بصلى كده
وقاللى انت راجل دع يا معلم رضوان •• طيب مين اللى
قاله بقى ، مش لازم عنده اخبارية بكل حاجة •

كبارة : مش مدير الأمن يا عم •

رضوان : الغرض •• حكينا له الحكاية •• يا سعادة ابيه احنا
اهل البلاسة اتخلقنا فى الربع اتنشانا فى الربع • جردود
اجدادنا اصل وجودهم فى الربع ، نقوم ننام ونصحا تلاقينهم
عاوزين يهدوا الربع طب نروح فين يا سعادة ابيه ،
تعرف حصل ايه ؟ انجعمص كده الراجل فى الكرسى •
وعض شفته ، وقال طيب احنا هنبحث الامر •

كبارة : يعنى ما قالش حاجة •

رضوان : شوف البهيم •• مش بقولك انت بغل استرالى ياواك عبارة
هنبعث الامر دى الخالق الناطق زى عبارة البحث جارى •

كبارة : وايه هيه عبارة البحث جارى دى ؟

رضوان : معرفش ، لكن هيه الخالق الناطق زى هنبعث الامر •

كبارة : انت بتتكلم جد يا معلم رضوان •

رضوان : اى كده وحياة دا اليوم العظيم •

جلال : على كل حال يا معلم رضوان انا شايف المجهود اللى انتوا
بتبذلوه مش كفاية انتوا لازم تعملوا جبهة فى الحى هنا
للدفاع عن قضيتكم •

رضوان : جبهة ايه يا استاذ احنا حا نحارب •

جلال : اكثر من الحرب مش حيهدوا بيوتكم وحايرموكوا فى
الشارع •

رضوان : عايز حرب اكثر من كده ايه •• وحتعمل جبهة ازاي
اذا كان العالم بتوع الحتة ما عندهمشم دم •

جلال : انا رايبى تصفوا خلافاتكم فى سبيل الغرض الاسمى ، فيه
تناقض ثانوى وتناقض رئيسى - التناقض الرئيسى بينكم

وبين الحكومة وده لازم تواجهد والتناقض الثانوى بينكم
وبين بعض وده لازم .. تصفوه *

رضوان : يا سلام يا أستاذ دا أنت مش عايش هنا - هو احنا
طالبين الثانوى ده .. دا أنا رجليا حفيت علشان أدخل
الواد الثانوى ده ما عرفتش قال ايه ما جابش مجموع
مع أنه فى الجمع ما فيش أخوه *

جلال : يا معلم رضوان انت بتتكلم فى حاجة وأنا بتكلم فى
حاجة تانية ماتفهمنى بقى *

رضوان : أنا بقيت أفهم حاجة اليومين دول *

كسارة : والله يا خويا اللى عاوزه حايمشى ، الملك عاوز يهد الزرع
يبقى حيه الربيع *

رضوان : انت بهيم .. بقى ممكن الملك يمشى كلامه على مدير الأمن *

كسارة : ويمشيه ع المأمور ، انت مايتشوفش الضباط والدنيا كلها
تبقي واقفة تضرب سلام للملك وهو خارج وداخل
السرايا *

رضوان : والنبي انت بهيم *

كسارة : أنا يا عم فايتك الحته وماشى ، خليك وراهم وبكره
تشوف *

رضوان : يا واد اقعد اشرب الشاى *

كسارة : شاى مين يا عم ، احنا شفنا شاى وللا شفنا حاجة *

رضوان : مات الشاى يا رمضان *

رمضان : حاضر يا معلم *

كسارة : أهو دا اللى احنا أخذناه منك (مقلد المعلم) مات الشاى
يا رمضان (مقلد رمضان) حاضر يا معلم .. دى حدوده
.. زى حواديت الاناعة *

رضوان : طيب روح يا بوز الفقر والله ما انت فالج *

جلال : افهم يامعلم رضوان .. السياسة بقت علم ولازم نتعلمه *

رضوان : وأنا يعنى قالولك على سياسى أوى .. أنا راجل قاعد
كافى خيرى شرى لالى دعوة بحد ولا حد له دعوه بيا *

جلال : مش مظبوط الكلام بتاعك ده .. اللى بيحصل اليومين
دول فى الربع سياسة ميه الميه *

رضوان : سياسة ايه يا اخويا .. دا دول عايزين يهدوا الحتة
وينيمونا فى الشارع مالها دى ومال السياسة .

جلال : اهى دى نظرة سطحية للأمور يا معلم . النظرة العميقة
بتقول ان الملك بيمثل الشواشى العليا لتحالف البرجوازية
والاقطاع يبقى السلطة الموجودة هتتفد كل اللى يخدم
اغراض الملك .

رضوان : والرابع ماله ومال الملك .. حتى ناس الحتة ناس فى حالهم
لا ليهم دعوة بحد ولا بمحدد .

جلال : المسائل مش بالبساطة دى .. فيه تحالف ضدكم .. انتو
كمان لازم تتحدوا مع بعض فى الحتة هنا .. ضد قرار
الهدم .

رضوان : (ساخرا) نتحالف . طب دى الناس حالفين ما يتحالفوا
مع بعض أبدا .. دى ناس تستحق الحرق .. نازلين أكل
فى بعض زى السمك .

جلال : ولازم الكل يقف ضد قرار الهدم ده فهت يا معلم .

رضوان : مانا فاهم كل حاجة .

(يدخلان البيت)

جلال : اهو ده اللى احنا بنسميه التناقض الرئيسى والتناقض
الثانوى .

رضوان : يا أستاذ همه رضيووا ده أنا حفيت واللى خلقتك .

جلال : يعنى انت حاولت يا معلم .

رضوان : هو انا ليه شغلة غيرها .. ده أنا طول النهار رأيح
عشان الشغلانة دى ولا حياة لمن تتنادى عالم ناقصة بعيد
عك ..

جلال : همه مين دول .

رضوان : همه بتوع المدرسة الثانوى دى اللى بتتكلم عنها .

جلال : يا راجل افهمنى .

رضوان : ما أنا فاهم كل حاجة .. احلف لك ميت يمين ان دماغى
بقت قد البطيخة من الزن اللى فيها طول النهار (مناديا)
ياد يا رمضان .

رءضان : نعمين يا معلم .

- رضوان : هات واحد مصرى ياد .
- رضان : حاضر يا معلم
- جلال : المهم يا معلم رضوان لازم تكافح .
- رضوان : ادى احنا بنكافح على اكل عيشنا .. هات ياد يا رمضان
المطلوب .
- رمضان : (يتجه نحو المعلم رضوان ومعه الجوزة)
المطلوب أهوه يا معلم رضوان .. اتفضل .
- (يتناول المعلم رضوان الجوزة ويخرج من جيبه قطعة
حشيش .. يتأمله جلال باهتمام) .
- جلال : غبارة دى يا معلم ؟
- رضوان : اجدع غباير .. حتشرب دلوقتى منها وتشوف .
- جلال : لا بلاش دلوقت يا معلم .
- رضوان : ليه بأه بطلتته .
- جلال : لا أبدا .. بس معايا واحد زميلى وما يصحش أشرب
قدامه (ينادى يا أستاذ مرجوش) .
- المصور : أيوه يا أستاذ جلال .
- جلال : صور المعلم بأه عشان نمشى .
- رضوان : طب استنى أما ألبس العباية .
- جلال : لا مش عايزين عبنى احنا .. كده كويس المهم عندنا نبرز
صور الفاقاة فى الحى .
- رضوان : وهيه فين الفاكه دى .. ما حيلتناش فاكه ولا اى حاجة .
- جلال : الفاقاة يعنى الفقر يا معلم .
- رضوان : متأخذناش يا أستاذ أصل احنا مبنعرفش انجليزى .
- (تبرز كاملة على باب المنزل)
- جلال : صبور با أستاذ مرجوش ماحتاش قدكم ، لا بذعرف
انجليزى ولا غيره .
- كاملة : همه بيصوروا ليه يا اخويا .. همه دول بتوع السرايا ..
همه برضوا اللى ينشكروا فى قلوبهم هيهدوا .
- رضوان : سراية ايه يا ولية انتى يا مجنونة .
- كاملة : مجنونة .. لا ماللكش حق بتقول كده يا معلم رضوان ..
أل مجنونة آل .. لا كله كوم ودى .. كوم .

جلال : (ثائرا) اخرسى يا ولية انتى

كاملية : آخرس ٠٠ آخرس ده ايه ٠٠ هو عششان انتو بتقوع
السرايا تقوموا تشتموا الناس وهمه قاعدين فى بيوتهم ٠٠
ال اخرسى ال ٠٠ باه مش عيب يا جدع انت وانت عيل من
دور عيالى تقوللى اخرسى ٠٠ هو عششان انت مع الملك ٠٠
ولايس افندى تقوم تشتم الناس فى بيوتها ؟

جلال : يا ولية اسكتى ما تبيعيش الموقف ٠

كاملية : انا جيت سيرة حد ٠٠ ليه هوانا مسكت فى خناقك ٠٠
هو انا جيت جنبك يا جدع انت ٠

جلال : شوف الجهل بتاع الناس ٠٠ احنا يا ست مش بتقوع
السرايا ٠٠ انا جاي هنا عششان مصلحتكم انا مندوب
مجلة البوق ٠٠ وجاي بنفسى هنا عششان نكتب عنك ٠

كاملية : وهتكتب عنا ليه يا اخويا عملنا حادثة واللا عملنا حادثة
٠٠ واللا ماشيين بطل لا سمح الله احنا ناس فى حالنا
وقاعدين فى بيوتنا ٠

رضوان : يا ولية خشى باه وفضك من خوته الدماغ دى ٠

كاملية : ليه هوانا واقفة فى ملكك ٠٠ واللا فى ملكك انا واقفة
يا اخويا قدام باب بيتنا ٠ سرايتى يا اخويا سرايتى ٠٠

جلال : مافيش حد كمان يتصور جنبك كده يا معلم رضوان
عشان تبقى صورة جماعية ٠

رضوان : تعالى ياد يارمضان جنبى هنا ٠

جلال : لأ حد تانى غير رمضان ٠

رضوان : انده كباره اجرى ياد يارمضان ٠

رمضان : (بصوت عال) ياكباره ٠٠ ياد يا كباره ٠

(يدخل كباره يمشى ببطء ببلاهة نحو الموجودين) ٠

كباره : عاوزين ايه ؟

جلال : تعالى يا جدع انت اتصور ٠

كباره : وعشان ايه اتصور ٠

جلال : تعالى هنا يا بجم ٠

كباره : قلت لك مش حاتصور انتوا عاملينلى فيش وتشسببيه
ما فيش جمعة ٠

- جلال** : يا راجل احنا حنطلعك فى الجرنال .
- كِبارة** : وانا اطلع فى الجرنال عشان ايه .. انا لا خطنت خطفة ولا مبهشت مبهشة .
- جلال** : اخص مافيش وعى عند الناس .
- رضوان** : ما تيجى ياد نتصور .
- كِبارة** : وحاتصور بتاع ايه يا معلم رضوان .
- رضوان** : يا واد حايدوا الحتة كلها .. لازم تتصور .
- كِبارة** : وانا مالى ما يهدوها .. انا ليه ايه فى الحتة دى ..
- حايدوا الصفايح .
- جلال** : خلاص انت صورت .
- المصور** : خلاص .
- جلال** : طب روح انت الجريدة باه .. وانا حاحضك (يتجه رمضان الى عربية الشاي ويتمطع المعلم رضوان) .
- رضوان** : يا نهار زى بعضه يا جدعان . وبتقول ما بتكافحش .. اديك شفت بنفسك .. شوف كافحنس اذ ايه عشان نتصور
- تصويرة زى دى ؟
- جلال** : معلش اقعد باه .. عشان نشرب لنا نفسين نعدل دماغنا .
- رضوان** : هات ياد يارمضان واحد مصرى .
- رمضان** : حاضر يا معلم .
- رضوان** : لكن قوللى انت مارضيتش تشرب ليه قدام الراجل التصاويرجى ده .
- جلال** : مايصحش برضه يا معلم اشرب قدامه .
- رضوان** : ليه هو الشرب عيب .
- جلال** : طبعا عيب ما فيش كلام .
- رضوان** : ولما الشرب عيب بتشرب ليه ؟ طب انا باشرب عشان مش عيب .
- جلال** : (مرتبكا) ما هو فيه حاجات كتير باه يا معلم ولع .
- (تخرج أم عنان وعزب)
- أم عنان** : والنبى صحيح يا أستاذ .
- عزب** : ما فيش غيرها يا أم عنان .. هنا المسرح وهنا الجمهور
- هنعمل هزة فى مصر يا أم عنان .

- أم عنان : البركة فيك يا أستاذ .
 (يضع رضوان قطعة حشيش على جوزة أخرى)
- رضوان : ولع .. ولع .. مساء الجمال (جلال يدخن بشراهة) .
 جلال : يا سلام .. آخر مزاج .. دى غبارة صحيح .
- رضوان : بس اياك يتمر فيك وتخلص لنا الشغلانة بتاعتنا دى .
 جلال : اظمن ما دام مجلة البوق واقفة معاكوا مايهمكش .
- رضوان : الحمد لله مدير الأمن طيب قوى .. من بختنا ربك عالم بينا .
- جلال : ما تتخدعش يا معلم رضوان .. تحالف الرأسمالية والاقطاع مع الملك فى سبيل تحقيق أهدافه بيتلون ألف لون ذى الحرياء .
- رضوان : واحنا مالنا ومال الملك والمقاطع دول ، أنا بقولك البيه مدير الأمن .
- جلال : ما هودا مجرد خدام للطبقة اللى بتحكم وللملك .
 رضوان : والله العظيم دا راجل نزيه ويحب الفرقة .
- جلال : الكلام ده تمبيع للموقف ، الكفاح يتطلب صلابة واستمرار .
 رضوان : ع العموم ولع .. ما تحملش هم .
- عسزب : أنا حاثيث للمثقفين بتوع الجامعة والكتب والكلام الفارغ ده حاثيث للمحبوسين فى البروج العاجية أن الفن الحقيقى هنا فى الألحان الخالدة مش اللى عملها زيمس كورساكوف ولا .. بتهوفن وانما هى اللى عملها الملحن المصرى المجهول أنا حاثيث للدنيا كلها ان أم عنان هى فنانة الشعب المصرى .
- أم عنان : ربنا يطول فى عمرك يا أستاذ .
- جلال : (وبعد أن يجذب نفسا عميقا) على كل حال مبروك .
 رضوان : يعنى رأيك انت كمان كده .
 جلال : كده ازاي .
 رضوان : انهم مش هيهودا .
- جلال : أنا بقولك مبروك على حاجة تانية ، انت بقيت – واحد مننا خلاص يا عم انت دخلت مأطف النهاراة .
- رضوان : أنا واللى خلقك ما تنقلت من هنا تطلع مركز ايه مأطف دى .

جلال : ماطف يا معلم اختصار لجملة منظمة أبناء الطبقة الفقيرة -
رضوان : وأنا خلاص دخلت فى الماطف ده ؟

جلال : أيوه مبروك ، والمنشورات بتاعتها امى ..
(يخرج أوراق من حقيبته)

رضوان : دى اعلقها كده من غير مؤاخذه زى التصاویر .
جلال : لأ دى بوزعها سرا .

رضوان : طب مانا أديها لأى عيل يوزعهم قدام السیما .
جلال : سیمة ایه وبتاع ایه بقولك توزعها سرا .

رضوان : سرا .. طیب هات .. بس اسمع بقى ، أول ما تاخذوا
الوزارة وحياة والدتك تشغل الرواد كبراة وتخاللى بالك
معانا من حكاية الهدد دى .

جلال : ماننوا كمان لازم تشدوا حيلكم معانا يا معلم رضوان ..
أحنا طول الشهر بننشر عنكم ماننشيات وبراويز
وصور .

رضوان : ما أحنا دافعين حق المناشط دى الجمعة اللى فاتت .

جلال : واحنا كل يوم عندنا ماننشيات يا معلم رضوان .

عزب : بس بصراحة يا أم عنان أنا خايف .

أم عنان : خايف من أهل الحنة يا أستاذ .

عزب : لأ يا أم عنان أنا خايف منك انتى .

أم عنان : منى أنا يا أستاذ .

عزب : أيوه يا أم عنان عندى شعور خفى أنك مش واثقة
من نفسك والفن عاوز ثقة عاوز اقتحام وأنا عارف أنك
متهيبة الموقف .

أم عنان : ده بس من هيبتك يا أستاذ .

عزب : أنا أمنحك روحى وقلبى وكيانى كله بس عاوزك تثقى فى
نفسك أرجوكى يا أم عنان .

أم عنان : أنا كللى لك يا أستاذ أنا خدامتك .

عزب : العفو يا أم عنان انت صحيح - ست جاهلة ومش مثقفة
لكن أنا الفنان المثقف أنا الللى خلقت علم الفلكلور فى مصر
مدين لك بحاجات كتير بعمرى كله ده طبعاً غير الـ ١٠٠٠
جنيه الللى على .

أم عنان : ما تقولش كده يا أستاذ .

عزب : أنا مش ممكن أنسى حاجة أبدا أنا راجل فنان يا أم عنان
مش راجل عادى ليكى ٢٠٠٠ جنيه يا أم عنان يعنى ليكى
٢٠٠٠ جنيه .

أم عنان : فداك ١٠٠٠٠ جنيه يا أستاذ .

عزب : على العموم سيبينا من الكلام ده وخلينا فى مشروعنا
- لو نجح حاندخل التاريخ .

أم عنان : ربنا معانا يا أستاذ انشاء الله حاننجد هو انت تعمل
حاجة ولا تنجش .

عزب : ابوه يا أم عنان لكن فيه عقبة قدام المشروع - لازم نتغلب
عليها .

أم عنان : قصدك عربية الشاى يعنى ٠٠ معلش ممكن نوعج المسرح
كده شوية .

عزب : مش مهم عربية الشاى احنا ممكن نشترها بـ ١٠٠ من
الواد رمضان ونكسرهما ثم هو حايسترزق من المهرجان .
العقبة الحقيقية يا أم عنان هى الفلوس انا لو الاقى ٥٠٠٠
جنيه جاهزين اعمل اكبر مهرجان للفن الشعبى فى مصر .

رضوان : على العموم ٥٠ جنيه لحد ما ربنا يفرجها .

جلال : اظمن يا معلم رضوان تصدق بالله واحد غيرك فى عملية
زى دى ما اخذ منه اقل من ١٠٠٠ جنيه .

رضوان : اظمن على العموم انت واصلك كام لحد دلوقت .
جلال : ٣٠٠ جنيه .

رضوان : خلاص الحساب يجمع ولع ولع نهارك قل باذن الله .

أم عنان : ما يكونش عندك اى فكر خذ دول بيعهم يا أستاذ على
فكرة هايجييو ١٠٠٠٠ جنيه .

عزب : طيب وانتى تعملى ايه .

أم عنان : فى سبيل الفن اضحى بحياتى يا أستاذ .

(يدخل المسرح الدكتور عزيز يرتدى بنطلونا وقميصا

وجاكتة ملونة ويدخن بايب ومعه كجارة ينظر اليهما المعلم

رضوان مندهشا)

رضوان : الواد كجارة صايد واحد خواجه اموه ٠٠ دلوقتى
يتحين منه .

كجارة : يا معلم رضوان .

رضوان : عاوز ايه ياد يا كباره ٠٠ سارح بالخواجه ده على
فين ٠

كباره : ده مش خواجه ٠٠ ده ابن عرب ٠

رضوان : باه ده ابن عرب يا ابن العبيطة ٠٠ فاهمنى مختوم على
قفايا (للخواجه جورج) ٠٠ امك اسمها حنفى ٠

عزيز : صباح الخير ٠

رضوان : الله ٠٠ ده ابن عرب صحيح ٠٠ صباح الأنوار اتفضل ٠

كباره : ده بيسأل عن الأثرات الموجودة هنا ٠

رضوان : اثرات ٠٠ واحنا حيلتنا اثرات واللا نيلة ٠٠ هنا مافيش
غير كاملة ٠

(ينهض هو وجلال ويصافحان الدكتور عزيز)

رضوان : من فضلك ٠

رضوان : اى خدمة ٠٠ اتفضل أقعد (يجلس)

عزيز : متشكر ٠

رضوان : اى خدمة ٠

عزيز : مش دى الربع ٠

رضوان : ٠٠ هو الربع من غير مؤاخذه ٠

عزيز : ايوه ٠٠ يبقى هوه ٠٠ انا دكتور عزيز أستاذ فى
الجيولوجى ٠

رضوان : يعنى من غير مؤاخذه أنت فى الصحة بأه ٠٠ طب ما تشد
حيلك معانا وتبخروا البيوت دى ٠

جلال : صحة ايه يامعلم رضوان ٠٠ الدكتور عزيز أشهر من
نار على علم تشرفنا يا دكتور جلال عبد الحميد
مندوب جريدة البوق ٠

عزيز : هاللو ٠٠ انت م الحتة هنا ٠

جلال : لا ٠ انا جى أكافح ٠٠ أصلهم جيهدوا الحى واحنا عاملين
حملة فى الجريدة ضد قرار الهدم ٠

عزيز : كويس ٠٠ انا جاي كمان عشان كده ٠

رضوان : طب الحمد لله اللى ربنا بعثك لينا ٠

عزيز : انت قلتلى ان ده اسمه الربع مش كده ٠

رضوان : الربع من غير مؤاخذه ٠٠ ال ٠٠ بلا ٠٠ قسمة ٠

عزيز : لا غلط ما اسموش الربع .. انت مش عارف أصل التسمية دى جاى منين .

جلال : الدكتور باه عالم كبير يا معلم رضوان .
رضوان : ربنا يزيد من نعيم الله .

عزيز : بقى أصل التسمية دى جاية من كلمة ربع وأرباع .. الواحد الصحيح مقسم الى أربعة أرباع .. زمان فى عصر الممالك الشراكسة اللى بدأ حكمهم بالسلطان برقوق .

المعلم : (ضاحكا) سلطان اسمه برقوق .. ها أو .. والله العظيم كانت عالم آخر مزاج بتوع زمان دول .. عندهم حق .. مكانش فيه غلا .

عزيز : الأرض كانت رخيصة يا معلم والتعداد ماكنش كثير .. كانوا يعرضوا حته أرض للبيع مساحتها فدان .. ويوزعوا الفدان أربع قسايم .. كل قسيمة ربع فدان .. وكان اللى يشتري لازم يشتري ربع .. والأمر دا كان له حكمتين .. الحكمة الأولى يا معلم أن البيت زمان كان لازم تتوفر فيه كل لوازم الراحة كانوا بيعملوا فى البيت مضيفة وقوض للضيوف كانوا يسموها قوض المسافرين .. وكان فى كل بيت مقناخ ودا كان مربوط للبنغال والحمير اللى تركيبها الضيوف .. علشان كده كان كل بيت بيتقام على ست قراريط يا معلم - يعنى ربع فدان .. والحكمة الثانية والأهم .. هو الحفاظ على الهارمونى بتاع المدينة ان كل البيوت تبقى شكل واحد وطبع واحد .

رضوان : طب والله العظيم بتوع زمان دول كانوا ذوق وأخر مفهومية .. مش زى اليومين دول .. واحد بينبلى عمارة طويلة ومسروعة زى أم سحلول والثانى بينبلى حته خص قزعة زى الواد الدكش بتاع سيرك الحكومة .

عزيز : المهم يا معلم .. الحته بتاعتكو دى مبنية على ربع م الأرباع بتاعة حى أمير الجيوش .. علشان كدة التطق السليم ربع مش ربع .

رضوان : يا سلام ! .. بقى احنا بقالنا مليون سنة سساكنين فى الحته دى غلط .. صحيح العلم نور .. أهو أنا بقالى أربعين سنة فى الحته دى ماسمعتش حد بيقول ربع (يمد يده بالجوزة)
تولع من غير مؤاخذه ؟

- عزیز : لا متشكر .. ما شربوش .
- رضوان : دى غبارة توسع المخ اوى .
- عزیز : متشكر .
- جلال : أقدر أعرف سيادتك جى الحتة ليه عشان أكتب خبر .
- عزیز : فى الحقيقة أنا جى فى مهمة وطنية .. الحكومة حتهد الربيع ده .
- رضوان : نفسك معانا يا دكتور .. خد ياد يارمضان الجودة دى خلىنا نسمع الكلام المفيد ده .
- عزیز : أنا لما قرئت الخبر فى الجرنال انزعجت .
- رضوان : ابن حلال مصفى .
- عزیز : عشان أنا كنت قرئت فى كتاب (ذا هول ستورى أف كايرو سيتى) ان الحتة دى فيها أثر قديم . يجوز م الأسرة السادسة م الأسرة السابعة م العصر القبطى م العصر الاسلامى . ما أعرفش بالضبط المؤلف الانجليزى نفسه ما حدش . فانا قلت لازم المحافظة على الأثر ده عشان كده أنا جاي أعين وأشوف الأثر بنفسى .
- رضوان : آثار ايه من غير مؤاخذه .
- عزیز : أنا مش عارف بالضبط .. الأول أشوف وأعين وبعدين أحكم .. انت حضرتك بقالك كتير فى الحتة دى .
- رضوان : من يوم ماالتنشآت الحتة دى وأنا فيها .. أبا عن جد .
- عزیز : طيب .. ما فيش بيوت أثرية هنا .
- رضوان : ياما .. عندك البيت اللى قدامك .. كان بتاع ابراهيم ورة فتوة الربع
- عزیز : آثار قديمة قصدى .
- رضوان : آثار قديمة .. قديمة يعنى أد ايه ؟
- عزیز : الفين سنة .. الف سنة خمسميت سنة .
- رضوان : لا انا ما أوعاش لحد كده من غير مؤاخذه .
- عزیز : لكن ما بتسمعنش ان فيه آثار موجودة .
- رضوان : آثار .. آثار يمكن قصدك ع الفسقية .
- عزیز : فسقية .. فين فسقية دى ؟

رضوان : أهوه فيه فسقية عندك فى الدرب جوه العيال بتوع التلت ورقات بيناموا فيها .

عزيز : ورقات ايه دى ؟ فيه مكتبة هنا ؟

رضوان : التلت ورقات دى بتاع السنيورة .. نحط ع السنيورة كده تكسب لكن حكمة ربنا عمرك ما تكسب .

عزيز : نصابين يعنى .

رضوان : عليك نور .. نصابين .

عزيز : لكن موجودة الفسقية دى لحد دلوقتى .

رضوان : اهى متلقحة .. هتروح فين ..

جلال : طب عن اذذكوا باه .. انا حا أخطف رجلى لحد الجورنال عشان اكتب خبر بتاع الدكتور عزيز ده .. كمان .. وانا متأكد ان المعركة كسبت نصير عظيم بوجودك .

عزيز : متشكر .

جلال : عن اذتك يا معلم رضوان .

رضوان : مع السلامة يا أستاذ .

(ينصرف جلال وبقي عزيز ورضوان وكبارة) .

ام عنان : انا فى سبيل الفن أضحي بحياتى يا أستاذ .

عزيز : يا سلام يا ام عنان .. بالظبط عزيزة المراكبية .

ام عنان : عزيزة المراكبية دى مين يا أستاذ .

عزيز : استاذة الفن الشعبى يا ام عنان ..

ام عنان : اخص عليك يا أستاذ فيه استاذة للفن الشعبى بعد منى .

عزيز : لا يا ام عنان دى مش بعد منك دى قبل منك دى كانت

زمان وماتت - الله يرحمها .. عزيزة المراكبية هى اللى

قالت جانى الطيب علنجه وهى اللى قالت صبرت ده انا

مش هفية وهى اللى قالت حمامى طائر على جرن الحبيب

بيلاغى فيه وشعرى على كتف الحبيب بيغلى فيه .

ام عنان : يعنى هيه الأحسن واللانا يا أستاذ .

عزيز : بعد المهرجان اللى جاى ده تاريخ الفن الشعبى مش حيتكلم

غير عنك يا سلام يا ام عنان (يضع الغوايش فى جيبه)

هنا المسرح (مشسيرا الى الخلف) وهنا الجمهور وتعرفى

مين حييجى يسمعك فى يوم المهرجان .

ام عنان : مين يا أستاذ ؟

- عزب** : انا عاملك مفاجأة كبيرة اوى .. اعظم فنانيين فى البلد
حبيجوا يسمعوكى هنا .
- ام عنان** : مين والنبي .. نائب عابدين .
- عزب** : نائب عابدين مين وبتاع مين يا ام عنان ام كلثوم
وعبد الوهاب الاتنين حيكونوا هنا وانا واثق انهم
حيصعقوا . الجرايد حاتكتب سنة الاذاعة حتذيع
من هنا .
- (يدخلان البيت)
- عزيز** : لكن دى جريمة يا معلم .
- رضوان** : ما فيش كلام .. والله العظيم ثلاثة مجرم اللى يطلع
العالم دى من بيوتها ويرميها فى الشارع .
- عزيز** : انا مش قصدى على كده . انا قصدى ع النصابين اللى
قاعدين فى الفسقية دى .
- رضوان** : وهيه الفسقية حتفضل .. ما هم جهدوا الحتة كلها .
- عزيز** : يهدوا الحتة ازاي دى أمور تغفيل .
- رضوان** : لكن مين يقرا ومين يسمع .
- عزيز** : لو حصل ده فى أوروبا لازم تقوم ثورة .. ازاي يهدوا
الفسقية .
- رضوان** : يا ريت يجى ع الفسقية يا دكتور ويهدوها فى ستين داهية
ع الأقل نخلص من العيال النصابين اللى نايمين فيها
دول .
- عزيز** : ازاي تقول الكلام ده فى منتهى الجهل .. اظن اهتمامكم
كله منصب على البيوت اللى انتوا عايشين فيها ولا
تساويش حاجة دى .
- رضوان** : دا هى بيوتنا يا دكتور امال يعنى ننام ع الرصيف والنبي
تتكلم لنا يمكن ربنا يسهلها ولا يهدوش الحتة .
- عزيز** : انت للأسف مهتم بمشكلة وقتية . انا مهتم بمشكلة تاريخية
ده الفرق .
- رضوان** : ما احنا غلبنا باه لما حسنا اتنبح .. لحد اول امبارح
بس رحنا عند البيه مدير الأمن فى الداخلية راجل طيب
زى حضرتك كده وبيفهم .

- عزيز :** يفهم ايه دى .. دى ما عندوش اى فكرة عن التاريخ .
- رضوان :** لكن بينى وبينك قال كلمة حكمة .
- عزيز :** قال ايه .
- رضوان :** بعد ما حكينا له المشاكل بتاعتنا يا محترم انجعض كده فى الكرسى وغمض عينه وقال حنبث الأمر .
- عزيز :** ايه يعنى دى .. مش فاهم ..
- رضوان :** ما هى دى باه لا مؤاخذه زى عبارة البحث جارى بالضبط .
- عزيز :** دى كلام فارغ .. انت ماشى فى طريق خاطيء .
- رضوان :** طريق خاطيء ازاي من غير مؤاخذه .. دى لغة ميري حنبث الأمر زى البحث جارى الخالق الناطق .
- عزيز :** مش مدير الأمن اللي حيوقف قرار الهدم
- رضوان :** وعشان توقف قرار الهدم لازم تسلك الطريق الطبيعى .
- رضوان :** وهو ايه الطريق الطبيعى بس .. ما احنا معانا منشورات .. ومن غير مؤاخذه حنوزعها سرا ..
- عزيز :** المنشورات مش هتحل المشكلة دى طريقة سفلية ، الطريق المثلى انك تقول وجهة نظرك فى البرلمان ، اعمل ندوات لمناقشة المشكلة ، فى لندن الواحد بيوقف فى هايدبارك ويقول لازم ناخذ طريق ديمقراطى انت مش ديمقراطى يا معلم .
- رضوان :** أنا حشاش من غير مؤاخذه .
- أم عنان :** طيب مش كنا عملناه فى حطة تانية نضيفة عن دى يا استاذ .
- عزيز :** لا ام عنان الفن الشعبى ما يزدهرش الا فى منبعه .. ثم انا باحب الحطة دى .. لولا الربع ما كنتش عرفتك .. ماكانش اتقابلنا يا أم عنان أنا لما قرئت خبر هد الربع فى الجرايد جيت جرى عشان أدرس الفن الشعبى على الطبيعة فى المنطقة علشان كده الربع له فى نفسى منزلة كبيرة اوى .
- أم عنان :** أهم حبيدوه يا استاذ .
- عزب :** فى ستين داهية بعد المهرجان ده يا أم عنان حاتخرجى من هنا حاتعيشى ع النيل فى الزمالك حايبقى ليكى عربية

وسواق وحاييقى ليكى صحفى خاص وجرنال .. حاتكى
فلوس حاتقرقى ورق ورق أخضر يا أم عنان باكوات
وأرانب يا أم عنان .

أم عنان : ربنا يخليك لى يا أستاذ .

عزيز : الطريق الديمقراطية هو الطريق الوحيد لازم يرتفع رأى
الناس ولازم نسمع كمان رأى الحكومة ومن خلال مقارنة
الحجة بالحجة لازم يحصل عمل كبير .

رضوان : ربنا يجيب العواقب سليمة .

عزيز : أبوه على رأى بيكون عندما يغش الانسان الضعيف
انسانا أضعف فانه لم يأت شيئا منكورا ولكن قيام فكرة
عظيمة فى وجه فكرة أخرى عظيمة نظيرها أمر ينشرح له
قلب الله .

رضوان : صدق الله العظيم .

عزيز : صدق الله العظيم ايه بقولك بيكون .

رضوان : عدم المؤاخذه يا أستاذ - أصل احنا بهائم لا نقرأ
ولا نكتب .

وع العموم أنا عايز أعرف حاجة واحدة بس عبارة حنبث
الأمر هى الخالق الناطق عبارة البحث جارى حاكم
الشاويش قاللى كده النهاردة الصبح .

عزيز : شاويش ايه دى .. أنا ما أعرفش الأشكال دى ..
تعرفها انت أنا ماليش علاقة بالبوليس .. عن اذنك أنا
رايح أعاين الفسقية . (ينهض عزيز) .

رضوان : روح معاه ياد يا كجارة .

كجارة : تعالى يا دكتور .

(ينصرف عزيز وكجارة الى داخل الحى)

رضوان : اسمع ياد يا رمضان .

رمضان : أبوه يا معلمى .

رضوان : عشرين جنبه أهم ياد يا رمضان .

رمضان : عاوز حاجة يا معلم .

رضوان : خش عند خالتك كاملة واقعد معاها .. تلين دماغها لحد
ماتبيسح لنا البيت .

- رمضان** : ودول عشان ايه يا معلم •
- رضوان** : دول عشرين جنيه مقدم ياد ولما تلين دماغها اديك ثلاثين
- رمضان** : ربنا يخليك يا معلم •• أنا مش هاعتقها غير لما تلين •
- رضوان** : شوف شغلك ياد •
- رمضان** : لكن قوللى يا معلم •• انت حتشترى البيت ازاي م الولية دى • وهما حيهدوا الحقة •
- رضوان** : مش حتتهد ياد •• حاكم احنا لما رحنا للبيه مدير الأمن فى الداخية وحكيينا له ع المشكل بتاعنا تعرف الزايل عمل ايه اتجعض على الكرسى بتاعه كده وغمض عينه وقال حنبحت الأمر •
- رمضان** : يا سلام يا معلم •• قال كده •
- رضوان** : اى والله العظيم • وعارف باه عبارة حنبحت الأمر دى الخالق الناطق زى عبارة البحث جارى •
- رمضان** : الحمد لله ربنا يسهل •
- رضوان** : روح انت بقى عند خالتك كاملة ولين دماغها •
- رمضان** : ما يكونش عندك فكر ما معلم •
- (يهرول رمضان الى داخل بيت كاملة • المعلم رضوان يتمتع) •
- رضوان** : يا سلام حنبحت الأمر •
- (ينصرف الى داخل الحى)
- عزب** : (محدثا نفسه) يا سلام مهرجان الفن الشعبى • المسرح هنا • والجمهور هنا وأم كلثوم وعبد الوهاب هنا •
- واخده بالك يا أم عنان •
- أم عنان** : (بعد فترة صمت) بتقول ايه يا أستاذ •
- عزب** : انتى سارحة فى ايه يا أم عنان •
- أم عنان** : لا أبدا يا أستاذ •
- عزب** : أنا عارف انت بتفكرى فى ايه الطفرة اللى حتحصلك حتكون شديدة شوية على نفسك • لكن أنا واثق انك هتستحميلها على العموم دا قلق الفنان الأصيل •
- أم عنان** : أنا كنت قصدى أقول يا أستاذ الأفراح مش هبقى أروحها بعد كده •

عزّيب : الأفراح دى مسالة اكل عيش وانت مش مخلوقة عشان
تاكلى عيش ٠٠ انت صنف تانى يا أم عنان الأفراح دى
مش شغلتك انت ليكى مهمة تانية مهنتك الحقيقية هى
تطوير الفن ٠ انت علامة فى تاريخ الفن ما بتظهرش الا
عند منحنى انتى المنحنى انتى يا أم عنان النسخة الجديدة
من سيد درويش ٠

أم عنان : انت بتشبهينى بالناس دول ليه يا أستاذ اخض عليك دا حتى
سيد دا اللى بتقول عليه فلس وقفل القهوة ٠

عزّيب : سيد درويش ٠٠

(سمع صوت كلاكس)

عزّيب : يا سلام هنا المسرح هنا الجمهور ٠

(كلاكس)

أم عنان : دى عربية يا أستاذ ٠

(يدخلان) ينظرا بانتباه نحو مدخل الشارع ويتعالى صوت

من خارج المسرح ٠

شوشو : فين الريع بتاع أمير الجيوش ٠

السائق : هوه اللى قدامك ده ٠

شوشو : آمال ليه مش فيه يافطة ٠

السائق : مافيش يقط هنا يا ست هانم ٠٠ كل ما تتعلق يافطة

يسرقوها ويبيعوها ٠

(تهرول أم عنان داخله الى المنزل وتدخل شوشو فى ملابس

أنيقة امرأة فى الخامسة والعشرين من العمر رشيدة وجميلة

وخلفها سائق التاكسى) ٠

السائق : سلامو عايكو يا أستاذ ٠

عزّيب : سلام ورحمة الله ٠٠ نعم ٠

شوشو : (تنظر فى ورقة فى يدها) انت حضرتك القهوجى اللى

هنا ٠

عزّيب : (مستنكرا) قهوجى ٠٠ باين عليه قهوجى ٠٠

السائق : ما تأخذهاش يا أستاذ الست غشيمة وأصلها مش من

هنا ٠

عزّيب : ع العموم حصل خير ٠٠ انتى عاوزة القهوجى فى ايه ٠٠

شوشو : أنا بسال عن واحد اسمه محمد كبارة أنت مش صاحبه ٠

- عزب** : محمد كجارة ٠٠ ده ولد جربوع بيتلقح هنا طول النهار
 ماعرفش راح فين دلوقت .
- شوشو** : طب مرسيه قوى ٠٠ الحمد لله اللي لقيته (للسائق)
 مرسيه شوفير .
- السائق** : الأجرة يا ست هانم .
- شوشو** : أوه ٠٠ أنا متأسفة قوى ٠٠ ما خدتش بالي انت عارز
 كام ؟
- السائق** : سبعين قرش .
- شوشو** : اتفضل (تفتح الشنطة وتناوله عشرة جنيهات)
- السائق** : ايه دى ٠٠ ورقة بعشرة جنيهه ٠٠ ماعدناش فكة احنا
 ما استفتحناش .
- عزب** : خد اتفضل .
- (يدخل يده فى جيبه ويخرج من كل جيب فكة ونصف جنيهه)
 سبعين قرش أهم مع السلامة .
 (ينصرف السائق)
- شوشو** : مرسيه ٠٠ انت جانتته خالص ٠٠ اتفضل انت العشرة جنيهه
 فكها وهات الباقي .
- عزب** : لأ ٠٠ انت يظهر ما تعرفيش الشعب كويس ٠٠ أنا عزب
 الشلشونى أستاذ الفن الشعبى واللى انتى عملتته ده يبقى
 عيب عندنا يا مدموزيل .
- شوشو** : أنا مدام شوشو ٠٠ أنا متأسفة قوى يا أستاذ ما تزعلش
 منى ٠٠ أنا أصلى تعبانة ومرهقة وأعصابى خسرانة
 خالص ٠٠ انت ما تتصورش أنا تعبت أد ايه لحد ما جيت
 هنا .
- عزب** : ليه ٠٠ انتى لفيتى كتير .
- شوشو** : لا أبدا أنا جيت فى التاكسى .
- عزب** : (مستهزئاً) يا شيخة الله يكون فى عونك طب اتفضللى
 استريحى (مشيراً الى الدكة)
- شوشو** : ممكن أقعد شوية .
- عزب** : ممكن قوى ٠٠ تقعدى شوية تقعدى كتير على كيفك (ترش
 الدكة والأرض بالكولونيا وتفرش منديل حريرى وتجلس) .

- شوشو : انت لطيف خالص .
- عزب : متشكر .
- أم عنان : (تتادى من الداخل) أستاذ .
- شوشو : الست بتاعتك .
- عزب : لا .
- شوشو : الجيرل فريند .
- عزب : لا دى .
- الست أم عنان . مطربة مصر الأولى .
- شوشو : أم كلثوم ؟
- عزب : أم عنان . صحیح . انتى لسه ماسمعتيش عنها لكن بكرة أم عنان حاتبقى أسطورة .
- شوشو : بكرة الساعة كام .
- أم عنان : (من الداخل) أستاذ .
- عزب : أبوه يا أم عنان حاضر لكن حضرتك جاية ليه الربع .
- غريبة أن واحدة زى حضرتك تخش الحتة دى .
- شوشو : انا عضوة فى جمعية ترقية الفقرا .
- عزب : ترقية الفقرا . دى مقرها فين دى .
- شوشو : شارع مظهر بالممالك .
- عزب : عال قوى . ترقية الفقرا بالممالك .
- شوشو : آه واخدين فيلا وعاملين فيها جمعية ترقية الفقرا .
- عزب : عظيم قوى . وجاية ترقى الفقرا هنا .
- شوشو : فى الحقيقة أحنأ جالنا طلب من واحد اسمه محمد كبراة فالجمعية اختارتنى عشان أقوم بالمهمة دى .
- عزب : و حضرتك جاية تديلو فلوس .
- شوشو : لا . أحنأ مانديش فلوس أبدا . الفلوس دى تسول .
- أحنأ مهمتنا زى ما جه فى الفقرة الأولى من قانون ترقية الفقرا عن طريق الارتفاع بمستواهم الفكرى والوجدانى .
- مأساة الفقرا يا أستاذ نقص التهذيب . انحطاط الأخلاق .
- خراب القيم .
- عزب : باه كده .
- شوشو : زى ما بقولك والله .

ام عنان : (من الداخل) يا استاذ •

عزب : ايوه حاضر يا ام عنان • وحضرتك حتهذبى محمد كباره
هنا والا فى الزمالك •

شوشو : انا فى الحقيقة مش عارفة •
(تخرج كاملة من منزلها ومعها رمضان القهوجى تنظر
كاملة الى شوشو)

رمضان : بس اتكلى على الله ولا يهيك • والله العظيم دى بيعة
نضيفه قوى •

كاملة : دى ايه ياختى دى •• عواف يادلعدى •

شوشو : باردون •• تقولى ايه •

كاملة : بقولك عواف يادلعدى ••

شوشو : انتى عاوزه تتدلى •

كاملة : ادلع •• ادلع ده ايه يا ولية يا ناقصة انتى •

عزب : لا •• لا •• لا يا ست كاملة •• مدام شوشو غريبة مش
من هنا ومافهمتش انتى قولتى ايه •• وواجب اكرامها •

كاملة : انا جيت جنبها •• انا كلمتها •• انا باقولها عواف
يادلعدى • تقوم ترد عليا الرد ده يخلصك انت يا عزب
أقنيدى •

عزب : معلش •• معلش •• حقك على •

كاملة : حقك فوق عينى وراسى يا أخويا • لكن الملا حكاية ادلعى
دى ••

انا ادلع •• باه انا عاوزه ادلع •• والنبي انتى من دور
امى •• ال يعنى السفيرة عزيزة كتك نيلة وانتى شكلك يغم
(تدخل منزلها) •

ام عنان : استاذ •

عزب : ايوه حاضر يا ام عنان • رمضان روح شوف كباره
للس •

رمضان : كباره دخل جوه كده مع واحد جواجه •

عزب : طب روح انده له ••

رمضان : اشعرفننى راح فين •• اهو خد الراجل الخواجه ودخل هنا

عزب : يا اراد بقولك روح شوفه •

• ينصرف رمضان وعزب يتفحص ساقها باهتمام)

• (تدخل أم عنان)

أم عنان : ايه الحكاية يا أستاذ هو الهوا جه سوا والا ايه

عزب : الله .. أم عنان .. هوا ايه ويتاع ايه .. يا شيخة
انتى مش عرفانى كويس والللا ايه ؟

أم عنان : أمال يعنى وقفت كثير معاها

عزب : فعلا أنا وقفت معاها . انما وقفت علشان أدرس دى

نموذج غريب جدا يصلح للدراسة هى دى يا أم عنان

م الناس اللى بيسموهم الذوات .. والغريب فى الأمر ان

كل البهايم بيطلقوا عليهم ذوات الأربع

أم عنان : وجاية تعمل ايه فى حتتنا يا أخويا

عزب : وليه مخبوظة فى عقلها جاية ترقى الفقرا وتهذب وجدانهم

(ساخرا) وجدانهم عشان كده احنا لازم نخش المعركة

• نخشها بقوة الشعب المصرى مش حيرتفع مستواه الا بالفن

الشعبى

أم عنان : والنبى دى باين عليها بت حرامية

عزب : لا ما هياش حرامية ولا حاجة . يعنى الحقة مشاء الله

يا أم عنان عشان الحرامية حيجوا يسرقوها

أم عنان : يمكن فائمة القبة تحتها شيخ

عزب : ماظننش حد فاهم كده يا سلام يا أم عنان المسرح هنا

الجمهور هنا وعبد الوهاب وأم كلثوم هنا وشوشو كمان

• هنا

أم عنان : الله شوشو دى ايه رخرة يا أستاذ البت اللى بتقول منلوجات

عزب : لا .. شوشو اللى كانت هنا بنت الذوات

أم عنان : الله ايه الحكاية يا أستاذ .. دى شوشو دى باين علقت فى

• دماغك أوى

عزب : ياما نفسى تفهمينى يا أم عنان .. أنا راجل ضيعت عمرى

وشروتى كلها ع الفن الشعبى .. أنا عصير تراب الشعب

المصرى .. أنا مزاجى شعبى باحب الطرشى أبو ميه حراقة

وأحب الفجل أبو طينه .. وأحب البصارة اللى عليها تقلية

(ينظر لساقها) رجلك دى يا أم عنان بألف واحدة زى

- شوشو دى •
 (تسمع صوت ضجة من الخارج عربات وهمهمات وأصوات
 مختلطة) •
- أم عنان : جالك كلامى يا أستاذ •
 عزب : ايه •• مش فاهم حاجة •
 أم عنان : مش قلت لك انها حرامية وجايبة معاها ذوات اهم ومعاهم
 عربيات •
- عزب : (يرهف السمع) تعرفى يا أم عنان • احلى حاجة فيكى
 انك انسانة ساذجة بريئة جاهلة وأنا باحبك عشان كده •
 (يرتفع الصوت من خارج المسرح)
- الصوت : انزل يا عسكرى انت وهو •• مجموعة تخش معايا الحتة
 وبقيّة العساكر يستنوا هنا •• اللى مش حينزل حترمى
 عفشه فى الشارع •
- عزب : دا البوليس يا أم عنان •
 أم عنان : بوليس •• يا خبر اسود يا أستاذ •
 عزب : أروح اشوف ايه الحكاية •
- أم عنان : لا والنبى ما انت منقول من هنا انشا الله يارب يدردكروها •
 (يدخل رضوان ورمضان الى المسرح)
- رضوان : يعنى لينت مذهبها •
 رمضان : آخر تليين يا معلمى •• دى ساحت فى ايدى زى الغبارة •
 رضوان : يعنى وافقت •
- رضوان : امال •• ما ترفضليش طلب واللى خلقك •
 رضوان : يبقى حنشترى ••
 رمضان : انشاء الله حنشترى •
- عزب : ده يظهر البوليس جاى يعزل الناس بالقوة •
 رضوان : يعزل الناس بالقوة •• طب على الطلاق بالتلاتة انا قتيل
 الحتة النهاردة •
- عزب : على كل حال التفاهم أحسن فى الحالات دى يا معلم •
 رضوان : مافيش تفاهم فيه كفناح •• أنا كنت عند البيسه مدير
 الأمن وقال لى هنيحت الأمر وعبارة هنيحت الأمر الخالق
 الناطق زى عبارة البحث جارى •

- عزب : طيب سيبنى اتفاهم انا معاهم .
- رضوان : مافيش حاجة اسمها تفاهم .. دى عالم تخاف ما تختشيش
(صارخا) على الطلاق لمصور قتيل النهاردة بعد كده .
(ياتى جمع من الناس على صراخه)
- اصوات : ايه الحكاية .. ايه الحكاية ..
- رضوان : البوليس جاى يهد الحتة .
- رمضان : يهد الحتة ازاي .. احنا نهد اللى يهد طوبة .
- عزب : برضه انا ما زلت مصر ان احنا نتفاهم معاهم .
- ام عنان : تتفاهم مع مين احنا مالنا يا استاذ .. هو انت زى دول
دول صياح .
- (تجره من ملابسه بينما عزب يصيح)
- عزب : سيبنى يا ام عنان . سيبنى يا ام عنان .
(تدخله المنزل بالقوة)
(يخرجان من اليمين)
- رضوان : مافيش تفاهم .. انا قتيل الحتة الليلاى .
- اصوات : كلنا معاك يا معلم .
(يدخل المامور على رأس قوة من العساكر)
- المامور : واقف ليه يا جدع انت وهو .. ممنوع التجمهر هنا ..
كل واحد يروح يشوف شغله .
- رضوان : المانش شغلة ولا مشغلة احنا عاملين جبهة احنا
ومعانا منشورات وحنوزها سرا .
- المامور : ايه اللى بتقوله يا جدع انت .. جرجره يا عسكرى .
- رضوان : هو مين ده اللى يجرجرنى اوعى .
(يندفع العساكر نحو الجمع ويتشابكون وتحدث معركة
بينما تنزل الستار) .

ستار

الفصل الثانی

المنظر :

نفس المنظر السابق وشوشو تجلس على مقعد من مقاعد
البلاج • وكبارة يجلس على الدكة فى جلباب أبيض نظيف
وطاقيه من نفس لون ونوع قماش الجلباب •

الوقت :

ظهرا ••

التاريخ

يونيو ١٩٥٢ •

شوشو : يائ ع الحر •• مافيش بحر هنا يا كبارة •

كبارة : فيه نشع جوه هنا هه •

شوشو : نشع •• أنا أول مرة أسمع ان فيه بحر اسمه النشع ••

فيه بحر أبيض بحر أحمر •• بحر أسود •• عمرى

ما سمعت ان فيه بحر اسمه نشع •

كبارة : لافيه عندنا احنا جوه •

شوشو : وفيه بلاج •

كبارة : آه كله ببلاش •

شوشو : يا خسارة •• ما جبئتش المايوه بتاعى يائ على الحر •

قوللى بان أنت مؤهلاتك ايه •

كبارة : أنا ما تأملتش من غير مؤاخذة • أنا أصلى بعيد عنك
محكوم على ما تأهلش •

(شوشو تدون هذه المعلومات فى ورقة معها)

شوشو : مين حكم عليك •• قاضى الأحداث •

كبارة : اللى حكم على من غير مؤاخذة ست جنية من تحت الأرض
كنت مخاويها ست طيبة قوى زى حضرتك كده •

شوشو : جنية •

كبارة : آه ماتخافيش دول ناس طيبين قوى زى حضرتك
تمام •

شوشو : يعنى ايه مخاويها كبارة •

كبارة : كنا عايشين سوا من غير مؤاخذة •• كانت تطلعلى هنا
كل يوم خميس تجيبلى كل طلباتى •• سجاير سوبر تجيبلى
عيش فينو تجيبلى جبنة اسطنبولى م اللى قلبك يحبها
تجيبلى • وطرشى كمان •

شوشو : تجيبها منين •• تشتري •

كبارة : لا تشتري ايه •• دول ما يظهرش على بنى آدم غير
اللى يحبوه •

شوشو : آمال تجيب الحاجات دى ازاي •• تعمل سحر •

كبارة : ولا سحر ولا حاجة •• بأه أصل الست الجنية دى
كانت أمها جنية وأبوها خواجه جريجى وكان مخاوى أمها
زى عبارتى أنا وهى كدة وبعدين نزل معاها تحت واستقام
وفتح سوبر ماركت •

شوشو : (بفرع) فتح سوبر ماركت •• تحت الأرض •

كبارة : آه •

شوشو : ويبيع لمن يا كبارة •

كبارة : للجنيات •• مامو فيه تحت كافة شىء زى فوق بالمظبط ••
سجاير سوبر تلاقى تحت •• جوافة تلاقى •• بلح أمهات
تلاقى •• ترميات كمان تلاقى حاكم أنا نزلت تحت وشفت
كثير أوى ••

شوشو : انت نزلت تحت معاها ••

كبارة : كثير •• مامى كانت تجيبلى هنا كل يوم خميس نقعد مع
بعض شوية هنا وناخد بعض وننزل تحت •

شوشو : وتعدوا فين تحت يا كباره .

كباره : في بيتهم . ما هم ماجرين تحت مطرحين وفسحة ومنافعهم
كمان . حاكم ناس مقتدرين قوى .

شوشو : وكنت بتنام تحت يا كباره .

كباره : آمال .

شوشو : وكانت بتجبلك هدوم .

كباره : ما كدبش عليك . هي كانت بتجيلى كل حاجة من
مجاميعه . سكر سنترفيش سجاير لوكس . لكن هدوم
لا . عشان معندهم تحت مانيفاتورة . حاكم هما
كلهم عريانين ملط . عشان الجو تحت الأرض سخن زى
الفرن .

(تلقى بالقلم والورق)

شوشو : ولسه الست دى بتطلع لحد دلوقتى هنا .

كباره : ياريت . ما هي زعلت معايا من زمان وما بقتش تطلع
وحكمت على ما تاهلش .

شوشو : طب اسمع يا كباره . انا عاوزة منك حاجة .

كباره : خدامك يا ست . ان كنتى عاوزة تخاوينى انا ما عنديش
مانع .

شوشو : لا يا كباره انت حالة .

كباره : ده انا حالى باه وحش قوى يا ست هانم .

شوشو : ما عرفش اذا كان وحش ولا كويس . باقولك انت حالة
وانت بالنسبة لى اول حالة بأدرسها عليك يتوقف نجاح
الجمعية بتاعتنا فى رفع مستوى الفقرا .

كباره : لكن انا مش حاسس ان انا حالة ولا اى حاجة .

شوشو : انا حاسس بروجرام اذا نفذته حدى المثل على ان الفقرا
ممكن يترقوا وممكن يبقو بنى آدم .

– البروجرام . موسيقى كلاسيك لمدة شهر وبعدين دروس
خصوصية فى اللغات لمدة شهر وحيندا دلوقت بالموسيقى
انا جبتك الريكورد – مخصوص أهوه . حا أسمعك مزىكة
كلاسيك يا كباره .

كباره : طب والنبي تسمعيني حاجة كدة للست أم عشان حاكم

دى عليها جعورة بس لفندى أبو كنبوش ده واكل فلوسها
خالص أصله بيشتغل فى الفونكفور .

شوشو : لفندى مين .. الأستاذ عزب .

كبارة : هو بعينه .

شوشو : قلت بيشتغل فين .

كبارة : فى الفونكفور .

شوشو : ايه الفونكفور ده

كبارة : حاجة كدة زى الدورارات .

شوشو : طب تحب تسمع ايه بأه .

كبارة : أحب أسمع ياليل ياأبو الغلابا ياليل .. وللا اقوك

سمعيني . الهى ما تحوجنى لاخويا ابن أمى وأبويا .

شوشو : ايه الكلام البلدى ده أنا حاسمك موسيقى كلاسيك .

كبارة : طب هاتى سيجارة .

شوشو : لا مش هاديك سجائر .. ميت مرة قلت لك لازم تراعى

صحتك .

كبارة : وهيه فين صحتى دى اللي حراعيها .. هوه عاد فيه

صحة يا ست هانم ده أنا انحنيت زى بيوت الربع .

شوشو : اتفضل خد السيجارة أهه .

كبارة : كتر ألف خيرك .. أولعها بأه وبعدين قولى اللي انت

عايزه تقولىه .

(يشعل السيجارة ويجلس على الأرض)

(يدخل بيت كاملة ثم يعود ومعه الصفيحة ويجلس عليها)

شوشو : والمعلم رضوان ده ما فيش أخبار عنه .

كبارة : المعلم رضوان .. الله يمسيه بالخير بأه

زمانه مرمى فى الحجز بتاع القسم .. ده كل ضارب

يا عالم .. يا خلق الله .

شوشو : انت بتحبه يا كبارة .

كبارة : أنا بينى وبينك لا بحب ولا بكره . أهى عالم بتورد

ع الواحد ..

شوشو : مسكين يا كبارة .. احساسك دا نتيجة البيئة .. البيئة

والوراثة أهم العوامل فى تكوين الشخصية .

- كِبارة** : هوه فعلا شخصية حلوة أوى •
- شوشو** : شوف يا كِبارة •• انت ينقصك حاجة واحدة بس عشان تبقى راجل غنى وناجح •
- كِبارة** : عندك حق •• أنا فعلا ناقصنى قرشين وأبقى غنى وناجح •
- شوشو** : لا انت ينقصك الشجاعة •• مآساة الفقرا هى الجبـز ما عندهمـش الحافـز علشان يغتـنوا ، - الواحد اللـى عاوز يغتـنى يا كِبارة يغتـنى لكن أنت ما عندكـش الرغبة ولا الحافـز الأغبـيا بقوا أغبـيا ازاي ؟ الناس اللـى نجحوا انجحوا ازاي •• بسـلاح واحد بس هو الشجاعة •• •• الشجاعة هى راس مال الحياة يا كِبارة •
- كِبارة** : مين قالك كـد •• طب ده الواد بكر كان شجـيع الحـتة دى كلها •• وحياتك مات شحات مش لاقى يهرش •• أنا عشان أبقي غنى ومبسوط قوى لايمـنى على كام باكو •
- شوشو** : لأ مش مظبوط يا كِبارة •• الشجاعة تصنع الفلوس تصنع النجاح وبعدين الفلوس • (كاملة تنادى - يا كِبارة)
- شوشو** : الجنية طلعت •
- كِبارة** : ياريتها تطلع •• احنا لاقين ياريت أيامها ترجع تانى •
- شوشو** : كِبارة أنا خايفة • (يرتفع صوتها دون أن تظهر على المسرح)
- كاملة** : ما حدش خدما غير المنيل كِبارة • (تخرج من باب بيتها فتشاهد شوشو فى أحضان كِبارة)
- كاملة** : انت ياللى تتنيل على عنـيك •
- كِبارة** : عاوزة ايه منى •
- كاملة** : لازم فوق الصفيحة يامنيل •• هات الصفيحة •
- كِبارة** : الصفيحة بتاعتى •
- كاملة** : والنـبى ان ما قمت لمطينة عيشـتك فز قوم انشالله ترمـاى ياكلـك مايخلى فيك حاجة (تدفعه فيسقط هو وشوشو •• يتشبث كِبارة بملابسها) ••
- كِبارة** : انت بتزقـينى •• طب والله مانا سايبك • (شوشو منكـمشة على الأرض مذعورة)

شوشو : هيه دى العفريته يا كباره .

كاملية : عفريته .. انشا الله ستين عفريت يركبوكى .. انتى
يا ولية انتى الدنيا ضاقت عليكى مش لاقية غير كباره .

شوشو : (فى خوف شديد) هو أصله قدم طلب .

كاملية : الشر بره وبعيد .. هيه الحاجات دى كمان بقت بطلب ..
وكمان فوق الصفيحة .

كباره : الصفيحة دى بتاعتى .

كاملية : سيب هدومى يالى تنقرص فى بطنك .. حتسيب واللا لا
(تنهال عليه ضربا وتصيب الضربات شوشو فتصرخ
مستغيثة .. يدخل فى هذه اللحظة الأستاذ خلال الصحفى
ومعه عدد من المجلة) .

جلال : ايه الخوته دى .. سيب يا جدع انت .. اوعى ياولية
انتى .

كاملية : الصفيحة بتاعتى يابنى .. نجسوها اللى يتقرصوا .
(جلال يقذف بالصفيحة بقدمه نحو الحائط)

جلال : خدى الصفيحة آمه .

شوشو : (تجلس على الدكة مذعورة) .. دكتور أرجوك .

جلال : دكتور ايه وبتاع ايه دلوقت (يفتح الجريدة) الحملة
بتاعتنا نجحت تقرر الافراج عن المعلم رضوان وارجاء
الهدم شهرا كاملا يعنى عندنا مهلة ل ٦ اكتوبر

كباره : الصفيحة بتاعتى يا أفندى .

جلال : احنا فى ايه وانتو فى ايه .. احنا بنحارب عشان
الحى كله وانتوا بتتصارعوا عشان صفيحة .

كباره : أنا متصارعتش .. هيه اللى رقعتنى بالقلم على قفايا .

كاملية : مافيش هد يا ابنى .

جلال : لأ مافيش والمعلم رضوان جاى دلوقت حالا .

كاملية : صحيح يابنى .

جلال : زى ما بقولك كده ..

كاملية : (تزغرد) المعلم رضوان طالع يا ناس أنا مش قولتلكوا
مش هيبهدوا سى حمدى القمندان قالى مش هيبهدوا
(تزغرد مرة أخرى)

(يهرع الناس من داخل الحى على صوت الزغرودة ويحضر بينهم الدكتور عزيز)

عزيز : مورنتج .

جلال : أهلا شفت الانتصار العظيم تقرر الافراج عن المعلم رضوان وارجاء هدم الحى .

عزيز : برافوا اتناقشتوا فى البرلمان .

جلال : ما تناقشناش .. ما فيش حاجة فى البرلمان . برلمان ايه وبتاع ايه .. دى الحملة بتاع الجريدة .

عزيز : طب كويس .. برضه كويس .. الصحافة هى السلطة الرابعة .

جلال : لا .. هيه السلطة الاولى فى الحقيقة .

عزيز : على كل حال دى وجهات نظر . التشريع الفرنسى بيقول انها السلطة الرابعة . فى بعض البلاد مالهاش اى سلطة . فى القرون الوسطى ما كنش للصحافة اى سلطة . كان مفروض عليها رقابة شديدة جدا ، الصحافة بدأت تنتعش فى مطلع القرن العشرين .. انا لسه امبارح قارى كتساب ضخم جدا عن الصحافة .. اسمه ..

جلال : مش ده المهم .. المهم ان احنا انتصرنا يا دكتور .

شوشو : دكتور .

عزيز : نعم .

شوشو : من فضلك .. انا مش قادرة آخذ نفسى .

عزيز : انا أسف يا هانم .. انا مش دكتور بتاع أمراض انا دكتور فى الأثا ر .

شوشو : انا أسفة جدا ..

عزيز : لا معلش .

كبارة : ايه الأثرات دى يا دكتور .

جلال : مانتش عارف الأثرات .. اللى زى أبو الهول والأمهram والحاجات دى .

كبارة : وهيه الحاجات دى بتعيا رخره .

(يدخل الأستاذ عزب الى المسرح يحمل لثائف كثيرة فيها أطعمة وأشياء أخرى)

جلال : أهلا وسهلا أستاذ عزب .. تعرف الدكتور عزيز والا لا ؟

عزب : (ينحنى للدكتور) تشرفنا يا افندم *
عزيب : (يمد يده ويصافح عزب) !أنا شفتك قبل كده * فين
مش عارف *

عزب : لازم فى فرح * فى قهوة بلدى * * أنا حاكم لفيت الريف
قرية قرية ولفيت المدن حارة حارة ماخلتش أنا عزب
الشنشلمونى * خبير فى الفنون الشعبية *

عزيب : لا * أنا ما أروحش حتة زى دى * أنا يمكن شفتك فى
لندن *

عزيب : لا أنا ما رحتش لنندن *

عزيب : فى جلاسجو يمكن *

عزب : لا * أنا ما خرجتس من مصر أبدا *

عزيب : ازاي * أمال تعلمت الفن الشعبى فين ؟

عزب : هو علشان أتعلم الفن الشعبى يا دكتور لازم أروح لنندن *

عزيب : بالتأكيد * أوروبا فيها جامعات للفن الشعبى *

عزب : وهنا كمان يا دكتور * أقدم جامعة للفن الشعبى *

عزيب : ايه عملوا جامعة للفن الشعبى هنا * * موجودة هنا *

عزب : من مليون سنة يا دكتور * من التراب اللى ماشى عليه

ده * العشش اللى انت شايفها دى * * هيه دى جامعة

الفن الشعبى * والناس الغلابة اللى انت شايفهم هنا *

هم دول أساتذة الفن الشعبى *

عزيب : دا كلام مش مظبوط * * الجو دا ممكن يديك التجربة لكن
الثقافة لا *

عزب : ما هى دى مأساة الشعب المصرى يا دكتور * المثقفون

بتوعه مش مؤمنين بيه * فاهمين ان أوروبا منبع الحضارة *

عزيب : هيه فعلا كده *

عزب : مش صحيح * منبع الحضارة الأرض دى * أستاذ العالم *

الراجل الحافى اللى عايش هنا * قد ايه أنا مؤمن بقدرات

الشعب ده * خد مثلا مأساة - الربع اللى احنا فيه ده *

ازاي حتنحل * ولو سمحتلى أجابب أنا على السؤال

اللى هيجل مأساة الربع الفن الشعبى أنا باعمل ملحمة

أسميها الربع الخالى *

- جلال** : الربع مالوش مأساة يا أستاذ عزب .. المسائل انفرجت كلها .
- عزب** : ايه .. حصل ايه .
- جلال** : تقرر الافراج عن المعلم رضوان وارضاء الهدم .
- عزب** : كده .. كويس قوى .. ومع ذلك أنا برضه هاعمل ملحمة الربع الخالى .. ماتتفضلوا معنا .
- جلال** : متشكر .
- عزب** : اتفضل يا دكتور احنا عندنا النهاردة فتة ولحمة رأس متعجبك قوى .
- عزب** : متشكر .. أنا عامل رجيم .
- عزب** : (يتوقف عزب عندما يفاجأ بشوشو ممددة على الدكة)
الله ست هاتم خير .. فيه ايه ؟
- شوشو** : أستاذ عزب .. أنا تعبانة .
- عزب** : لا سلامتک حاسة بايه ؟
- شوشو** : دايخة .. مش قادرة أخذ نفسى وبطنى بتوجعنى .
- عزب** : ببسطة خالص .. خديك شوية كمون .
- شوشو** : ايه كمون دى .
- عزب** : دا طب شعبي .. سبيكى من البنسلين والكلام الفارغ بتاع اليومين دول .. دا اسمه الدجل الطبى . الطب الحقيقى فى الأعشاب .
- عزب** : على كل لو تكرمت اتفضلنى معايا .
- شوشو** : مش قادرة أقرم .
- عزب** : مش قادرة تقومى .. طيب أساعدك أنا .
(يلف يده حول خصرها ويساعدها على الحركة يضطرب جدا عزب كل ما يلتصق بالمرأة وينظر اليها نظرات ذات معنى ويدخلان الى البيت وخلفهما كجارة) .
- عزب** : جالسا على الكرسي واضعا ساقا على ساق (بيتتارف - بتاح - على جثتى .
- جلال** : بس انت متأكد أنه بيتتارف - بتاح يا دكتور .
- عزب** : طبعاً متأكد .
- جلال** : بس هنا نشر الخبر ده هيعمل هزة .

عزيز : انا بقالى عشرين سنة بادرس تاريخ يا أستاذ .. انا العالم الوحيد التكنولوجى المعتمد فى الشرق الأوسط .. أما أقول دا بيت رف بتاح يبقى بيت رف بتاح .. النقوش اللى عليه مش ممكن تكذب أبدا .

جلال : يبقى كويس يا دكتور لو قدرت تقنع الحكومة بعدم هدم البيت ده .

عزيز : لو اتلمت كل أساطيل الأرض علشان تهده .. مش هتقدر انا هاتير الرأى العام العالمى كله انا هاستنجد بالأمم المتحدة .. باليونسكو .. لو اتهدت مصر كلها مش ممكن يتهد بيت رف بتاح .

رمضان : (قادمنا من الخارج يجرى) المعلم رضوان طلع .

جلال : (مبتهجا) صحيح يا واد يا رمضان .

رمضان : أيوه والنبي يا أفندم .. الزينة بتاعته سدة الشارع بره والمزيكة وطبل بلدى .. حاجات ايه .. هنرقص النهاردة آخر رقص .

(تسمع المزيكة والطبل ويدخل كثير من الرجال الى الساحة تتقدمهم المزيكة .. المعلم رضوان لحيته نابثة ويبدو عليه اثر السجن) .

جلال : (يحتضن المعلم ويقبله) ألف مبروك يا معلم رضوان ألف مبروك ..

رضوان : تشكر .. ازيك يا دكتور (يصافح الدكتور) .

كاملية : هيهدوا .. هيهدوا يا معلم رضوان .

رضوان : مين دا اللى هيهد .. اللى يهد هنهديله .

كاملية : يسمع منك ربنا .. ربنا ع القوى .

رضوان : (لأفراد المزيكة) اتوكلوا على الله بقى كل حى يروح على شغله .. عايزين نقعد شوية فى رواقه يا سلام كل ده من قر العالم واللى خلق الخلق .

(ينصرف أفراد المزيكة وباقى الناس ويبقى المعلم رضوان وجلال ينزل كباارة من بيت أم عنان ويجلس أمامهم على الأرض بعد أن يصافح المعلم رضوان ويعانقه)

رضوان : يا سلام .. الحمد لله اللى جت على كده .

جلال : انت قدما وقدود يا معلم .. الحمد لله اللى ربنا كلل جهودنا وكفاحنا بالنصر .

- رضوان : شوف أنا عشت أد ايه يا أستاذ عمرى ماشفت اللى جرى
لى فى الثلاثين نهار دول •
- عزيز : انت قعدت أد ايه فى السجن ؟
- رضوان : ثلاثين نهار يا دكتور •
- رضوان : آمال بالليل كنت بتروح فىن •
- رضوان : (يضحك) كنت بروح الأكندة •
- عزيز : لوكاندة نظيفة •• فىن ؟ شبرد والا مينا هاوس •
- رضوان : لا وانت الصادق شبرد •
- عزيز : شبرد مش بطال •• بس الأكل بتاع سميراميس أحسن •
- رضوان : لا •• لا متعتلش هم •• الحمد لله كُنا هنا أجوازا وأشراذنا
- جلال : انما شفت نتيجة الحملة بتاعتنا بقى يا معلم رضوان •
- رضوان : حملة ايه يا أستاذ جلال • الحملة اللى بحق وحقيق جت
فوق دماغى أنا ع العموم محدش خلص الموضوع غير
الراجل البيه مدير الأمن •• هو اللى خلص الموضوع •
- عزيز : ايه قابلته فى السجن •
- رضوان : لأ •• قابلته قبل السجن يا دكتور وقالها كلمة وهية حكمة
واللى خلقك بعد ما شرحنا له أحوالنا • تعرف يا محترم
انجعص على الكرسى كده •• وقال هنبحث الأمر دى يعنى
ايه •• الخالق الناطق البحث جارى - لكن دى لغة
ميرى ما تعرفهاش ••
- عزيز : وكنت مبسوط فى السجن •
- رضوان : قوى •• آخر انبساط •
- عزيز : عملت اجتماعات مع أحد المسئولين •
- رضوان : كل يوم اجتماعات على ودنه •
- عزيز : قابلت مين فىهم ؟
- رضوان : عم عبده •
- عزيز : عبده مين ده ؟
- رضوان : شاويش الحجز •• ايده واللى خلقك ولا المرزبة •
- عزيز : واتناقشتوا سوا ••
- رضوان : اتناقشنا ؟
- عزيز : مناقشة •• مناقشة •• كلام •

رضوان : لا وحياتك يا دكتور .. احنا تناقشنا صحيح .. بس من غير كلام .. ساعات بالدواني . ساعات بالروسية ساعات بالجزم .. جزم ميرى م اللى قلبك يحبها .

عزيز : ايه حصل ضرب .

رضوان : هو ضرب بعقل يا دكتور .

عزيز : الحكومة هيه اللى بتضرب ؟

لكن دا ضد وثيقة حقوق الانسان .. ارفع قضية يا معلم .

رضوان : على مين ؟

عزيز : على اللى كان بيضرب .

رضوان : وأنا عارف مين اللى كان بيضرب .. ييجى الف واحد كان بيضرب .

عزيز : انت من ححك ترفع قضية .. هاييوس كرويس فى صفك .

رضوان : هلببيوس مرقص مين .. الأفندى ظابط المباحث .

عزيز : مباحث مين وبتاع مين .. هاييوس كرويس قانون رومانى قديم .. معناه ابرز الجثة .

رضوان : يا راجل وحد الله .. بلا مرقص ولا كوهين .. على الدنلاق ما فيه فائدة يا دكتور .

جلال : لا انت غلطان يا معلم .. اللى حصل ده نتيجة صراع

طبقى عنيف .. اللى حصل لك ده .. مش مسألة فردية ..

دى مسألة اجتماعية .. اللى حصلك ده معناه ببساطة ..

ان فيه ضغط من الشعب على الأجهزة الحاكمة .

رضوان : هو فين الضغط ده يا خويا .. الضغط كله كان فوق رقيبتي

.. القلم كان بيسكع فوق قفايا يسمع .. انا المعلم رضوان

اللى ، زى الوحش كان بيضربنى عسكرى أصفر غلبان

لو تنفخه يطير وماكنتش أقدر اتكلم تقولى ضغط .. دنا

اللى جالى ضغط واللى خلقك .

جلال : بس الخوف الوحيد على الحركة هو الأيس .. العنف

يا معلم رضوان .. والثورة الدائمة هما الوسيلة الوحيدة

للإصلاح دا كلام قالوه اللى قبلنا .

عزيز : لا يا أستاذ جلال .. الديمقراطية هي الحل .

جلال : الديمقراطية عمرها ما كانت حل يا دكتور ..

الديمقراطية أعلنت افلاسها من زمان .

عزیز : بكرة تعرف انك مخطيء يا أستاذ لما تشوفنى ازای معالج
مشكلة بيت رف - بتاح *

جلال : وحياتك انت لو اكتفيت بالمناقشة يا دكتور هيهوده *

عزیز : بيت رف - بتاح مش هينهد الا على جتتى *

رضوان : ايه العبارة ما تفهمونى *

جلال : الدكتور عزيز اكتشف بيت أثرى فى الحثة هنا *

رضوان : بيت مين دا يا أخويا *

عزیز : بيت رف - بتاح *

رضوان : عبد الفتاح دا مين .. ان اياك عبد الفتاح الكمسارى

والله يا دكتور لو هدوا هيهدوا كل البيوت *

عزیز : بيت رف - بتاح مش هيهوده *

رضوان : ليه معنى .. على راسه ريشة .. هيهوده يعنى هيهوده ..

ولو اتلامض هيجو يجروه وينضرب ألف قلم ..

جلال : رع - بتاح راجل قديم - دا مات من تلت تلاف سنة *

رضوان : برضه يجرجروه *

جلال : انت ايه جرالک يا معلم .. انت ماكنتش كده ..

رضوان : هفيش حاجة بتفضل على حالها يا أستاذ .. كل شيء

بيتغير الحديد بينبرى .. والحكومة جامدة قوى ..

يا خبر اسود على اللى شفقه يا جدعان *

(ينهض وينهض معه عزيز وجلال)

جلال : على فين يا معلم ؟

رضوان : على بيتنا *

عزیز : طب عن اذنكم *

جلال : على فين يا دكتور *

عزیز : أنا رايح أقابل المسئول وأقدم له تقرير عن الاكتشافات

الأثرى الهام والمستندات .. وأخليه يستصدر قرار وزارى

بعدم الهدم *

جلال : على العموم ربنا يوفقك يا دكتور وأنا هانشر الخبر منشئت

عزیز : باى *

جلال : مع السلامة (ينصرف عزيز) ما قتلتيش بقى يا معلم

منعمل ايه

رضوان : ولا حاجة .. على رأى المثل من خرج من داره انتقل
مقداره وأنا صاحب عيال متجاوز ثلاث نسوان وكفائية
البهدلة اللى شغناها .

جلال : لكن دا عيب يا معلم .. دا انت فتوة الحى انت لسان
حال الناس دول .

رضوان : اللسان ده أنا هاقطعه من لغلوجه .

جلال : بس دا موقف فكرى .. هيحسب عليك .

رضوان : فكرى مين ياأبا؟! يروح سى فكرى يطول لسانه ويشوف
ايه ح يجراه - أمال عايزنى أعمل ايه .. انسجن تانى
اياك .

جلال : وفيها ايه لما ننسجن يعنى .. احنا نشرنا صورتك على
أربع أعمدة فى الصفحة الأولى واسمك احتل أكبر مانسجت
فى الجريدة .

رضوان : يا فرحتى يا خويا .. أدى انت سوقت الجرنال بتساعك
على حسى واسترزقت ما جببتليش كيلو عنب فى السجن ؟
- ماجببتليش علبه هليوود ما وصتتش واحد ظابط صاحبك
يخفف السكع على قفايا شوية .

جلال : بالعكس .. احنا كان من مصلحتنا ان اللى حصلك ده
يحصل أكثر منه مش هاننتصر يا معلم الا اذا اتعلمنا
الكره .. لازم نتعلم الحقد ، شدة العدل تنبثق من شدة
الظلم .

رضوان : على الطلاق مانا مكافح .. يا عم بلا كفاح بلا نيلة ..
احنا نكافح على أكل عيشنا وبس .

جلال : بس دا تخاذل منك وموقف مخزى وارتماء فى أحضان
الرأسمالية والاقطاع وتسليم لطبقة الرجعية .

رضوان : زى بعضه انما وحياتك لعزل دلوقت سلامو عليكو يا استاذ
يا خبر اسود على اللى حصللى يا جدعان ياخبر اسود على
اللى شفته يا جدعان .

(ينصرف المعلم رضوان حزينا مهموما بطيء الخطى
وينظر اليه جلال حتى يختفى عن انظاره .. ثم ينظر نحو
كبارة الذى يكون جالسا مكانه لا يتحرك ويتقدم اليه
ويقول) .

جلال : شفت الموقف الاستاتك ده .
كيسارة : مفيش موقف تاكس هنا ابدا . تمشى أفرنجى كده على
رجليك يا أستاذ .

جلال : تاكسى ايه وبتاع ايه انت راخر يا راجل يا جاهل بقولك
موقف استاتيكى .. مش ديناميكى .

كيسارة : أنا لا أعرف ميكانيكى ولا أعرف كهربائى . أنا قاعد فى
حالى يا خويا مستنى الست شوشو لما تنزل .. أصل
أنا حالة .

جلال : (ساخرا) دا انت حالة فعلا .. اتفر .
(ينصرف جلال ويدخل شوشو وعزب الى المسرح)

شوشو : مرسى قوى يا أستاذ .. انت جانتية قوى .

عزب : بالعكس .. دنا اللى شاكر فضلك .

شوشو : على ايه .. أنا عملت ايه ..

عزب : على اللحظات العظيمة اللى انت ادتيها لى .. أنا من
عشر سنين يا مدام شوشو ما هترتش عصبيا زى اليوم
ده .

شوشو : انت بتبالغ يا أستاذ .

عزب : لا وحياتك .. أنا لا أبالغ ، من عشر سنين وأنا بالف زى

الوابور من قرية لقرية ومن بلد لبلد ومن حارة لحارة ..

من سوق لقهوة بلدى لفرح فى حى شعبى - كل ده فى

سبيل الفن .. النهاردة بس رجعت لنفسى .

شوشو : على العموم أنا مبسوفة جدا اللى عرفتك يا أستاذ

ولو تنازلت تبقى انت عنيه اللى ببص بيها للفقرنا أنا عمرى

ما فهمت الفقرا زى النهاردة دا انت معجزة .

عزب : الأمر مش معجزة ولا حاجة .. المسألة بسيطة للغاية

يا مدام الحب هو مفتاح الفهم .. والفهم هو مفتاح

الحقيقة .

شوشو : انت بتعرف فى الحب كمان يا أستاذ .

عزب : أنا بحب الشعب .

شوشو : طبعا منا كمان بحب الشعب .

عزب : أيوه صحيح .. بس مش حب أصيل .

- **شوشو** : يعنى تفتكر مش هافهم الشعب أبدا يا أستاذ .
- **عزب** : بالعكس المسألة عاوزه شوية تدريب .
- **شوشو** : طب ايه رأيك تبقى انت المدرب بتاعى .
- **عزب** : لى الشرف .
- **شوشو** : يعنى اتفقنا .
- **عزب** : اعتبرى الاتفاق نافذ المفعول من اللحظة دى .
- **شوشو** : طيب خلاص انت معاك العنوان .. وعلى فكرة أنا كمان ليه مدرب فى الكروكيه .. كان واد قemor أوربيفوار يا أستاذ .
- (تهم بالانصراف)
- **عزب** : مع السلامة .
- **كبارة** : انت يا ست .
- **شوشو** : ايه يا كبارة .
- **كبارة** : احنا مش هندرس والا ايه .
- **شوشو** : لا يا كبارة .. انا تعبت خالص النهاردة .
- **كبارة** : تعبتى .. الله يكون فى عونك .. طب والبتاع دا اللى بيعزك .
- (مشيرا الى الكاست)
- **شوشو** : آه .. آه .. اديه للأستاذ عزب .
- **عزب** : كاسيت .. يا سلام .. هو انت حققت حلم قديم من أحلامي بالكاسيت ده هاسجل ثروة فنية من الفن الشعبى .
- **شوشو** : كده .. خلاص خليه هدية .
- **عزب** : لا مش ممكن .. اسمحيلي ما اقبلوش .
- **شوشو** : لا .. أرجوك تقبله يا أستاذ .. دا مش هدية منى لك .. دا هدية منى للشعب .
- **عزب** : اذا كان كده معلش .
- (تنصرف ويتناول عزب الكاسيت ويتفحصه)
- **عزب** : (محدثا نفسه) يا سلام .. بتاع ميتين جنيه (ينادى)
- ياواد يا كبارة .
- **كبارة** : عاوز ايه ..

- عزب : خد يا وله .. خد ده عشانك ..
- كبارة : ايه ده .. يا أستاذ .
- عزب : ربع جنيه يا وله .
- كبارة : ربنا يخليك لنا .
- عزب : بس اسمع يا وله .. ما تجيش سيرة لأم عنان .
- كبارة : عشان البتاع الهباب ده يعنى .
- عزب : لا يا وله .. عشان مدام شوشو يعنى .. ماتقولش ان احنا
طلعنا فوق .
- كبارة : هوه انتو طلعتوا فوق يا أستاذ .
- عزب : عقارم عليك ياواد ياكبارة .. خد ربع جنيهه تانى أهه
اسمع يا وله اذا جت الست أم عنان وانت قاعد ..
قوللها الاستاذ جه وانتظرك كثير .. وراح مشوار لحد
البيه مدير الاذاعة عشان يعمل العقد .
- كبارة : حاضر يا أستاذ .
(ينصرف عزب ومعه الكاسيت وكبارة ينظر فى النقود
ميتهاجا - يدخل أبو سريع شديد الاضطراب)
- أبو سريع : قرب .. قرب ..
- كبارة : أبو سريع .. أبو سريع .. ما عرفتش المعلم رضوان
هيمشى .
- أبو سريع : هيمشى على فين .
- كبارة : معزل من الحتة .
- أبو سريع : والله الحتة حتخرب من غيره .
- كبارة : ما تخرب يا خويا .. يارب الدنيا كلها تخرب .
- أبو سريع : ما انت شحات .. قلبك على ايه .
- كبارة : يعنى انت اللى ما شاء الله قوى .. ما انت سارح طول
النهار فى الشارح بالتلات ورقات .
- أبو سريع : بس يا ريتها تدوم ياواد يا كبارة .. أهو الراجل الخواجة
المجنون بتاع الاثرات جه يطربقها على دماغنا .
- كبارة : ليه يا خويا .. دى حتى المسقية اللى انتوا قاعدين فيها
مش هتتهد .
- أبو سريع : ماهى مش هتتهد صحيح .. لكن الراجل المجنون هيحوظها
بسلك وهيجيب عساكر تقف عليها .. قال ايه .. أثرات .

كبارة : أه بيقول انه لقي عندكم حجر منقوش .
بو سريع : منقوش ايه الراجل المجنون ده .. دا حجر احنا
جيبينه م الجبل .. واحنا اللي ناقشينه كنا بنقطع منه حتت
حتت ونبيع منها للسواح على انها ال ايه .. انتيكة ..
الأفندى الخواجة جه بص للحجر كده وقال دا بيت
عبد الفتاح .. بقى ده مش جنان والنبى .
جبارة : طب وانت هيهمك ايه ما تسييه ياخده .

أبو سريع : ما هو ياريت ياخده ويروح فى داهية .. أنا مستعد
أجيبه كل يوم أربعين حجر وانقشله عليه كمان .. لكن
المصيبة لا الحكومة تسمع كلامه ويطردونا م البيت .

كبارة : يا سيدى زى بعضه .. يمكن ربنا يتوب عليك م التلات
ورقات .

أبو سريع : أهى سيوية يا واد يا كبارة .. الواحد بيقول يارب دهما
نعمة .

كبارة : على كل حال ولا يهيك .. أنا حلمت حلم ياد يا أبو سريع
ربنا يجعله خير .

أبو سريع : حلمت ايه يا فالج

كبارة : اللي جانى فى المنام لابس أبيض فى أبيض وقاللى قوم
ياد يا كبارة قول قمت فضل ساحبنى من ايدى لما رحنا
عند باب .. فضل يخبط ان حد يرد .. أبدا ولا حياة
لمن تتادى .. يتحايل عليهم مفيش فايده .. يناغشهم
بالكلام .. مفيش فايده .. يكتب لهم مكاتب مفيش
فايدة .

أبو سريع : مانت وش فقر .. السكك مسددة فى وشك .

كبارة : حلمك على بس .. شوية يا واد أبو سريع .. وجهه
شاب حليوه طويل وعريض لابس أصفر فى أصفر وهب
ضرب طلقة فى الباب وقاللى ادخل يا كبارة وعنها ياد
يا أبو سريع والاقى نفسى فى جنيئة ولا جنيئة الأورمان
جناين ايه .. وفواكه ايه .. كافة شئ قلبك يحبه تلاقى ..
تفاح أمريكانى تلاقى .. جواقة حلران الحلوة .. بلج
أمهات وحيوانات من كل صنف - أسود تلاقى .. غزلان
تلاقى .. وعنها ياواد يا أبو سريع والراجل اللي لابس أصفر
فى أصفر ده خدنى من ايدى ودخلنى فيلا .. فلل ايه ..

حاجة تشرح القلب ٠٠ ع الصفيين طول مانت ماشى ٠٠

قول أنا استلمت فيلا ٠٠

ابو سريع : استلمت ايه ٠٠ بواب ٠

كبارة : زى ما بقولك ياواد يا أبو سريع أنا استلمت فيلا حاكم كل

راجل جدع يستلم فيلا ٠

ابو سريع : وهم حيعرفوا يشوفوه جدع والا لا ازاي ٠٠

كبارة : الغرض يا واد يا أبو سريع ٠٠ الفيلا دي دورين أول دور

للالكل والقعاد ٠ تانى دور للنوم والحموم وكل واحد

يستلم فيلا ٠٠ يستلم معاها جلابيتين للصيف وجلابيتين

للمشتا ٠٠ بتوع الشتا كستور م المقلم اللي قلبك يحبه بتاع

المحلة ٠٠ بتوع الصيف بوبلين نضيف قوى ٠٠ قول نمت

شوية ياد يا أبو سريع وصحيت الصبح لقيتهم بيجهزولنا

فطار ٠٠ بكوك شاي نضيف قوى وكباية قزاز ٠٠ وفول

مهروس بالسمن وحتة جبنة اسطانبولى ٠٠ ولا جينأ

الخواجة كرياكو - وجرجير معصور عليه ليمون وأرب

صوابع موز ٠ وعلبة سجاير سوبر عشرين

ابو سريع : مفيش طرشى ياواد ٠

كبارة : كافة شىء نفسك فيه بيجى لحد عندك ٠٠ عاوز طرشى تلاقى

ليمون مخلل معصفر تلاقى ٠٠ ملح بفلفل كمان تلاقى ٠٠

الغرض يا واد اتمشيت شسوية ورجعت نمت ٠٠ قمت

م النوم ٠٠ لقيت الغدا جاهز ٠

ابو سريع : (وقد أصبح شديد الاهتمام للحديث) ٠٠ ايه الغدا يا واد

يا كبارة ٠

كبارة : طبق ملوخية بتقلية م اللي قلبك يحبه ٠٠ وأرنب سمين

بيجى أربع أرتال متحمر نص تحمير كده ٠٠ وطبق طرشى

بلدى يعروق خضرة من اللي يفتح النفس وأربع أرغفة

مفقعين ٠٠ كئت برتقان ٠٠ وخدت كمان علبة سجاير

عشرين ٠

ابو سريع : هو فيه من كدبك برتقان فى الصيف ٠

كبارة : مفيش هناك شتا ياواد ٠٠ الجو ربيع ٠٠ كل شبابيك

الفيلا ع البحر ٠

ابو سريع : وبعدين ياد يا كبارة ٠

كبارة : قول نمت شوية ٠٠ وقعدت بالليل لقيت نسمة طرية حلوة
قوى فى الجو وخرجت مشيت فى الجنان ورجعت لقيت
العشا جاهز ٠

أبو سريع : لقيت ايه ياواد يا كبارة ٠

كبارة : لا ٠٠ بينى وبينك بقى ٠٠ العشا كان خفيف حته مربى ٠٠
شوية عسل نحل ٠٠ قالب زبدة وتفاحتين وشربت شاي
تقيل وانقلبت نمت لكن قبل ما اتمام ياواد ٠٠ دخل على
الراجل اللى لابس أصفر فى أصفر ٠

أبو سريع : ما انتش وش نعمة ٠٠ لازم جاى يطردك منها ٠

كبارة : لا ياد يا أبو سريع ٠٠ راجل طيب قوى ٠٠ دا جاى يظمن
بنفسه على حالى ٠٠ قعد شرب معايا فنجان شاي ٠٠
وبعدين سألته احنا فين يا راجل ياطيب ٠٠ قاللى انت فى
الجنة يا كبارة ٠

أبو سريع : وبعدين ياد ٠

كبارة : ولا بعدين ولا قبلين ٠٠ صحيت من النوم ٠

أبو سريع : لقيت نفسك عريان طبعا ٠

كبارة : منا عريان طول عمرى ٠

أبو سريع : جتك نيلة ٠٠ أنا عرفت تفسير الحلم ده ٠٠

كبارة : طب قوللى ايه ٠

أبو سريع : الجنان اللى شفتها دى هى الربع ٠

كبارة : بقى الجنان هيه الربع ٠٠ والنبى انك حمسار ٠

أبو سريع : ما هما ميهودوا الربع يابهم ٠٠ عشان بينوا فيها جنان
ويعملوا فى وسط الجنان عمسارات ٠٠ وطبعما هيعملوا
أبوابها من الذهب ٠٠ يبقى أصفر فى أصفر ٠٠ أهو ده
الحلم ٠٠ اسمع يا واد يا كبارة خليك هنا وفتح عنك
كويس ٠٠ اذا شفت الراجل بتاع الأثرارات جاى ٠٠ ارقع
صفارة من بتوعك ٠

كبارة : هتعملوا ايه ٠

أبو سريع : هناخد الحجر نلقه فى الخرابة ٠

كبارة : لكن دا راح يقابل الوزير ٠

أبو سريع : يقابل الوزير ٠٠ يقابل الخفير ٠٠ احنا هناخده نلقه

فى الخرابة ٠

(ينصرف أبو سريع وكبارة يجلس على الدكة ويخرج النقود
من جيبه ويتفرج عليها فى ابتهاج ، فيدخل الشاويش
عبد الرحيم ومعه ورقة)

عبد الرحيم : واد يا أبو سريع .. خد هنا يا وله .. انت ياواد يا كبارة .
كبارة : يا خير اسود .. اهو أبو بدلة صفرا جه .. والحلم
اتحقق يا كبارة .

عبد الرحيم : واد يا كبارة .
كبارة : نعمين يا شاويش ..
عبد الرحيم : انت مطلوب فى القسم بكره الساعة خمسة .. انت والواد
أبو سريع النصاب .

كبارة : طب واننا ليه بقى يا عم الشاويش عبد الرحيم .
عبد الرحيم : لهر انت متجادل .. روح القسم يعنى تروح الاشارة
معايا أمه .

(تنبه على المدعو محمد كبارة والمدعو ابو سريع حسنين
بالتوجه للقسم الساعة خمسة مساء الغد) .. مفهوم
والامش مفهوم ..

كبارة : واننا هروح القسم أعمل ايه انا ..
عبد الرحيم : الله .. انت لكع ليه يا واد انت ياد روح ليهو انت أجدع
من المعلم رضوان .

كبارة : يههمم بكلام غير مفهوم .
عبد الرحيم : انت بتقول ايه يا واد انت ياد .
كبارة : ما قلتش حاجة .

عبد الرحيم : ما قلتش حاجة .. يعنى انا أطرش بقى واللى خلق الخلق
منا عاتقك عن مرواح القسم دلوقتى .. اتجر قدامى .
(يدفعه بيده)

كبارة : بس ما تزعلش .
عبد الرحيم : انت بتزعق فى وشى يا واد .. طب خد ..
كبارة : (صارخا) ثم انت مالكش ضرب على كمان .

عبد الرحيم : انت يا واد بتقول ثم ان .. والله عال النهاردة ثم ان ..
ويكره تقوللى ربما .. ما هى البلد بقت فوضى .. طب
واللى خلق الخلق منا عاتقك (ينهال عليه ضربا ويجرجه

الى خارج المسرح وكبارة يصرخ فيلتقى بأم عنان داخله
الحي ومعها رجل معه ناي طويل) *

أم عنان : يا لهوى .. هو كبارة عمل ايه يا شاويش عبد الرحيم
عبد الرحيم : ما حدش له دعوة ... كل واحد يكون فى حاله .. بقى
بتتبول ثم ان ياسى كبارة ..

(ينهال عليه ضربا)

أم عنان : يادى الخيبة يا جدعان .. الراجل نازل ضرب فى الواد
زى الغول كده ليه ياخواتى هم عالم مايبتهدوش .. ربنا
يهدمم ..

كاملة : (تخرج مهرولة عند الباب)

هم هيهدوا يا ختى ..

أم عنان : هم فين دول اللي هيهدوا ؟

كاملة : الحكومة ياختى .. هيهدوا الربع .. بقى انت مش
عارفة ..

أم عنان : ما يهدوا .. يارب يهدوها النهاره قبل بكرة .

كاملة : يارولية حرام عليكى ماتقوليش كده .. الهى ينهد حيله اللي
يهد طوبه فيها *

أم عنان : يعنى شايفة الطوب قوى مشاء الله دى كلها تراب .

كاملة : تراب وللا طين .. اهى مدارية العالم .. وللا اكمنك
مالكيش فيها ملك يالدلعدى *

أم عنان : (مستهزئة) ملك .. بتسميه ده ملك .. دى خرابه .

كاملة : اهو متاويكى ..

أم عنان : كلها شهر بس يا كاملة وبعدين .. اتف ع الربع واللى
فيه !

كاملة : ليه ياختى .. حتورثى وللا ايه ؟

أم عنان : اورث .. انا مش بتاع ورث وكلام فارغ زى دا انا فنانه
الشعب الاولى .. بعد شهر واحد يا كاملة متبقى أم عنان
اللى قدامك دى حديث الدنيا كلها .. صورتى فى
الجراید .. صوتى بيلعلع فى الاذاعة .. حفلاتى تسمعها
الدنيا كلها .

كاملة : ربنا يفضحك أكثر وأكثر .. مانتوا يا بتوع الهشك
هشك .. ما بتخافوش م الفضيحة .

أم عنان : (تمشى فى الساحة فى زهو وتقيس المسافة بخطواتها
كما كان يفعل الأستاذ عزب فى الفصل الأول وتحدث نفسها
بصوت عال) .

ياسلام يا أم عنان هنا المسرح .. (تلتفت للخلف) هنا
الجمهور .. هنا أم كلثوم وعبد الوهاب .. مهرجان
الفن الشعبى .

كاملة : انت اتجننت وللا ايه ..

أم عنان : ما انت مش ممكن تفهمى .. انت عايشة فى البلاقسة
وهتموتى فى البلاقسة وهتدنفنى فى البلاقسة كمان .

كاملة : الدور والباقي عليكى انت ياللى هتدنفنى فى الزمالك .

أم عنان : لا مش هتدنفن فى الزمالك يا اختى .. أنا ما سكن فى
الزمالك بس .

كاملة : أيود .. ما هى الزمالك بتلم أشكالك .

أم عنان : (وهى تنصرف لبيتها) أنا باحكى لمن .. هافهم طوبه
زيك .. أما يرجع الأستاذ عزب هخليه يفهمك .

كاملة : عزب دا ايه يالدلعدى .. هو عزب هيرجع تانى .

أم عنان : دا هيرجع بالسلامة .. منا عارفة ان كلكم حاسدينى
منا عارفة انكم هتفلفلوا منى .. دا هيرجع غصب
عن عنيكو .

كاملة : والنبي تتوكسى وانت ما انت عارفة حاجة .. عزب ما طار
ياولية .. طار ياختى مع الست شوشو .

أم عنان : (بغضب) ايه الست شوشو دى رخرده .

كاملة : ما انتيش عارفة الست شوشو بتاعة محمد كباره الست
الخوجاوية بتاعة جمعية الفقرا اللى بيقرلو عليها .. قعدوا
فوق ساعتين عندك . وأنا واقفة - ورا الشيش مرقباهم
(تضحك ضحكة خبيثة) ياخرايبك يا كاملة ع اللى عملوه ..
والنبي مانى قايللك عملوا ايه .

أم عنان : (تندفع نحوها) ياولية بتغيظينى .

كاملة : بغنيظك .. هغنيظك ليه بقى .. أسألى الواد رمضان
والواد كباره ماهما كانوا واقفين .. قال ايه فنانة مصر

كاملة : ربنا يفضحك أكثر وأكثر .. مانتوا يا بتوع الهشك
هشك .. ما بتخافوش م الفضيحة .

أم عنان : (تمشى فى الساحة فى زهو وتقيس المسافة بخطواتها
كما كان يفعل الأستاذ عزب فى الفصل الأول وتحدث نفسها
بصوت عال) .

ياسلام يا أم عنان هنا المسرح .. (تلتفت للخلف) هنا
الجمهور .. هنا أم كلثوم وعبد الوهاب .. مهرجان
الفن الشعبي .

كاملة : انت اتجننت وللا ايه ..

أم عنان : ما انت مش ممكن تفهمى .. انت عايشة فى البلاقسة
وهتموتى فى البلاقسة وھتدنفنى فى البلاقسة كمان .

كاملة : الدور والباقي عليكى انت ياللى ھتدنفنى فى الزمالك .

أم عنان : لا مش ھندفن فى الزمالك يا اختى .. انا ما سكن فى
الزمالك بس .

كاملة : أيوه .. ما هى الزمالك بتلم اشكالك .

أم عنان : (وهى تنصرف لبيتها) انا باحكى لمين .. هافهم طوبه
زيك .. اما يرجع الأستاذ عزب هخليه يفهمك .

كامله : عزب دا ايه يالدلعدى .. هو عزب ھيرجع تانى .

أم عنان : دا ھيرجع بالسلامة .. منا عارفة ان كلکم حاسدينى
منا عارفة انكم ھتفللوا منى .. دا ھيرجع غصب
عن عنیکو .

كامله : والنبي تتوكسى وانت ما انت عارفة حاجة .. عزب ما طار
ياولية .. طار ياختى مع الست شوشو .

أم عنان : (بغضب) ايه الست شوشو دى رخزه .

كاملة : ما انتيش عارفة الست شوشو بتاعة محمد كباره الست
الخوجاية بتاعة جمعية الفقرا اللى بيقلولو عليها .. قعدوا
فوق ساعتين عندك . وانا واقفة - ورا الشيش مرقباهم
(تضحك ضحكة خبيثة) ياخرباك يا كاملة ع اللى عملوه ..
والنبي مانى قايللك عملوا ايه .

أم عنان : (تندفع نحوها) ياولية بتغيظينى .

كاملة : بغيظك .. هغيظك ليه بقى .. اسألى الواد رمضان
والواد كباره ماھما كانوا واقفين .. قال ايه فنانة مصر

(تضحك) ..

(تدخل امرأتان وستة أطفال يحملون مراتب والحاف
ومخدرات وحصيرة وحللا وخلفهم المعلم رضوان ..
ورمضان)

رضوان : شوف يا واد عربية كارو وحطوا عليها العزال واركبوا
وروحوا انتوا وأنا جاى وراكم .
(ينصرف الأولاد والستات)

احدى السيدات : اقعدى بعافية يا كاملة .. نشوف وشك بخير .
(وينصرفوا) - (تندفع نحو كاملة) .

كاملة : معلم رضوان .. هم ميهودوا يا خويا ..

رضوان : يهدوا بقى وللا ما يهدوش يا كاملة اللى فى علم الغيب
هيتنفضن .

كاملة : ميهودوا والنبي .

رضوان : ما حدش عارف لسه يا ست كاملة .

كاملة : عين وصابتنا .. يا خرابى عليكى يا كاملة .. يا خسارة
السرايا يا جدعان .. خمسين سنة وأنا أعمل وادبق
عشان ابنى وأعمر .. يهدوها يا خواتى .. يا خرابك
- يا كاملة والنبي ما حد حاطط ايده عليها (تتحسس جدران
بيتها وتقول) ميهودها يا خويا .. ميهودها يا ضنانيا
وسى حمدي القمندان والكلام اللى قالهولى ..
(تلطم فيندفع نحوها رمضان) يا خرابك يا كاملة
يا خرابك ..

رمضان : ما تروقى أمال يا خالة كاملة .

كاملة : أروق ازاي يا خويا .

(يدفعها بلطف داخل بيتها)

رمضان : خشى أمال وصلى ع النبي .. اللى هيجرى ع الكل هيجرى
عليكى .

(كاملة تواصل اللطم والصراخ فى الداخل) .

(رضوان يبدر على وجهه الغم والتأثر الشديد وينفجر
بأكيا فجأة فى تشننج مسموع)

رمضان : لا حول ولا قوة الا بالله .. لا حول ولا قوة الا بالله
(يجلس على الدكة وينخرط فى البكاء - رمضان يخرج)

من البيت ويغلق الباب وصوت كاملة ، يتردد
صداه) •

رمضان : دا معقول دا يا معلم رضوان انت بتعيط •

رضوان : أعمل إيه بس يا رمضان ما هو ما بقاش فاضل غير
العياط •

رمضان : يعنى كان لازم تسبب الحتة النهاردة يا معلم رضوان ••
مش كنت استقمت كام يوم كده فى الحتة وكنت فكرت فى
الموضوع كده على رواقه وبعدين تبقى تتصرف •

رضوان : لازم أسبب الحتة يا رمضان الحكم اللى على كده ••
واللى هما عايزين يعملوه ياواد هيتنفذ •• هيهدوا الحتة
هيهدوها مفيش فايذة •• دول ناس سوء •• واحنا
مش قدمهم •• يا خبر اسود على اللى شفته يا جدعان •

سكتار

الفصل الثالث



المنظر :

نفس المنظر - رمضان مشغول باعداد الشاي وكبارة
جالس على الصفيحة -

الوقت :

ليلا

التاريخ :

يوليو ١٩٥٢ .

رمضان : قوم يا واد يا كبارة .

كبارة : اقوم اروح فين .

رمضان : قوم يا واد املى الجردل ورش الحقة اللي قدامنا .

كبارة : انا مبارشش .. رش انت ..

رمضان : ياواد انا صاحب عربية .. قوم رش خللي نسمة هوا

تيجي ..

كبارة : عنها ما جت ..

رمضان : الله .. الله .. والله عال ياسي كبارة بقيت راجل امة .

كبارة : انا ياد راجل طول عمرى .. راجل وابن راجل كمان ..

اقطع لسانك بقي واحفظ اديك .

رمضان : انت افتريت قوى يا كبرارة .. والله العظيم اللى طلعم
م السجن ظلمك . انت كان حقا اترنيت تآبيدة . والنبي
أول ما أشوف الشاويش عبد الرحيم لاخلية يجرجرك
ع القسم .

كبرارة : وماله القسم .. مرحبابه .. فاهمنى هاتهنز .. مابتهنز
أنا يا اخويا .
(يجلس كبرارة على الصفيحة ويقوم رمضان يرش الساحة
ويحدث نفسه) .

رمضان : اخص . عالم ماليتها الا الحرق .. والله العظيم دا الظلم
فيكو حلال .

كاملة : (من الداخلى) هيه راحت فين يا خواتى .. الصفيحة
كانت ملقحة هنا الوقت ماحدث خدما غير اللى ينشك فى
دراعه كبرارة .

(تخرج عند الباب وتنتظر الى كبرارة) ينيلك .. انت ياواد
عليك عفريت اسمه الصفيحة .. قوم يللى تنشك فى
دراعه .

كبرارة : (ينهض ويقذف اليها الصفيحة بقدمه) امى عندك
كليها ..

كاملة : شوف يا خويا الواد بيرمى الصفيحة فى وشى اذائى ..
هو السك اللى انت كلته على قفاك فى السجن ياواد
ما كنفكش .

رمضان : هو دا صنف يحوق فيه .. دا صنف عاوز الشنق .
(كبرارة يسير فى خيلاء شديد ويداه فى جيوب جلبابه
كأنه قائد منتصر) .

كاملة : شوف ياخويا المنيل على عينه ماشى منقوش أزائى زى الديق
الرومى .. دا الراجل رضوان اللى ملو دمومه ودخل
السجن طلع منه يا نضرى مكسور .

رمضان : ما هودا صنف شحات ما بيهموش .

كبرارة : (يسير على نفس الخطى)
الحمد لله ما عنديش عربية شائى .

رمضان : وهو انت تطول بيقى عندك حاجة . دانته اللى زيك ريند
منزل عليه المقت .. حتى الشائى ما تطولوش .

كِبارة : (يسير بخيلاء شديد جدا) انا الحمد لله فاضى وقاضى
لا عندى عربية شامى ولا عندى سرايا (ينظر لكاملة)
الا سرايا قال ٠٠ دول لو شوية هوا جامدين يطريقوه على
اللى فيه .

كاملة : (وهى تدخل) انشا الله ينطبق فوق دماغك (يدخل
الضابط والدكتور عزيز والعساكر - بيدو على الدكتور
عزيز الضيق الشديد) .

الضابط : خد يا وله انت وهوه ٠٠
(يتقدم كِبارة ورمضان نحوه فى نعر شديد)

الضابط : فين الحجر ٠٠
(ينظر كِبارة ورمضان نحوه مدهوشين)

الضابط : ما تستعبطش انت وهوه ٠٠ فين الحجر الأثرى .
رمضان : انا والله يا بيه ما اعرف اى حاجة ٠٠

الضابط : يعنى مش عاوز تقول مكان الحجر فين .

رمضان : والله يا بيه ما اعرف اى حاجة ٠٠ انا راجل صاحب
عربية .

الضابط : طيب فين الحجر ٠٠ راح فين .

عزيز : دول مش ممكن بيجوا بالمناقشة ٠٠ دول ما يجوش الا
بالضرب .

كِبارة : والله ٠٠ انت مش كنت بتقول زمان مفيش حاجة تتحقق
الا بالمناقشة .

الضابط : اخرس ٠٠

كِبارة : وانا قلت حاجة تانية يا بيه .

الضابط : بتشتغل ايه ؟

كِبارة : انا على باب الله .

الضابط : صايح يعنى ٠٠ جرجرم يا عسكرى ع القسم وجرجروا
العربية بتاع الواد دا كمان .

رمضان : (متوسلا باكيا) لا والنبى يا بيه ٠٠ جرجزوتى انا فى
ستين داهية بس سيب العربية .

الضابط : يلا بلاش خوتة ٠٠ اتفضل يا دكتور عزيز ٠٠ اتفضل
(ينصرف البوليس وعزيز والضابط الى داخل الحى ريبقى)

رمضان وكبارة وعدد من الجنود)

رمضان : والنبي يا شايش تسبب العربية وتاخذنى انا ..

العسكرى : اكنم وانت فاتح على جاعورتك كده ..

رمضان : والنبي انا ما عملت حاجة يا شايش .. انا راجل صاحب
عربية .

العسكرى : انجر بلاش لكاعة ..

(يسحب أحد الجنود العربية فيعترض رمضان طريقه .

العسكرى يدفع العربية فى اتجاه رمضان يشدها فى
الاتجاه الآخر - يسقط من فوقها اثناء الدفع والمقاومة
العدة كلها فيرتفع صوت رمضان بالصراخ) .

العسكرى : انت مش حتبطل صوت زى النسوان

ورمضان : خدونى انا وسيبوا العربية .

العسكرى : ملعون ابوك وابو العربية .. والله لنكسرهما

(يقلبون العربية ويكسرونها ثم يجرجروا رمضان وكبارة
الى القسم - رمضان يصرخ ويصيح وكبارة يمشى هادئا
متزنا) .

رمضان : (باكيا) كسروا العربية يا كبارة

كبارة : (يضحك) .

رمضان : بتضحك على ابيه يا واد .

كبارة : ما اضحكش ليه .. ما عنديش عربية والحمد لله ..
شحات زى انت ما قلت ياواد يا رمضان .

العسكرى : انتوا هتسهروا وللا ايه .. انجر ع القسم ياواد انت
وهوه .

(يدخل الضابط ومعه عزيز واثنان فقط من العساكر)

الضابط : طيب يا دكتور .. انت هتقف هنا ومعاك اثنين عساكر

علشان يجرسوك والعساكر التانيين حسيبهم هناك مع

العمال لحد ما تخلص عمليات الحفر .

عزيز : متشكر .. بس الحجر لازم نلقاه .

الضابط : هنلقاه انشاء الله . ما يكونش عندك فكر .. وانا تحت امرك

دايما انت معاك نمرة تليفونى .. اى لحظة تحتاج مساعدة

اتصل بيا على طول .

عزيز : بس انا خايف يا حضرة الضابط .

الضابط : خايف من ايه يا دكتور .

عزيز : انا خايف م الناس دول .. دول ناس اشرار بعدين يعملوا
دوشة .

الضابط : ما تخافش .. دول ناس ورق .. عسكري واحد يجريهم
كلهم وع العموم اذا حد عمل دوشة انت عندك السلطة
اللى انت عاوزها .. سيادة وزير الداخلية مدينا أمر ..
وانت عندك كارت بلانش تعمل اللى انت عاوزه .
عزيز : يعنى اعمل اللى انا عاوزه :

الضابط : زى ما انت عايز .. ودلوقت عن اذنك يا دكتور واحنا
هنواصل البحث عن الحجر الأثري .
(ينصرف الضابط - يجلس عزيز على الدكة منتصفا كأنه

رومل والعساكر تقف على يمينه ويساره تحرسه .
(تخرج كاملة على الباب ومعها الصفيحة)
كاملة : واد يا رمضان أمال فين المواد كجارة - واد يا كجارة خذ
الصفيحة ياواد امه . (مشيرة نحو الدكتور)

عزيز : اخرسى .. ولية جاهلة .

كاملة : بتقول ايه يا ابنى ..

عزيز : اخرسى بلاش دوشة ..

كاملة : ما انا يا ابنى كنت باسال ع الدوشة .. هو ايه اللى
حصل .

العسكري : العمال الصياغ اللى كانوا هنا سرقوا حجر .

كاملة : سرقوا حجر . وهيه الحجارة بتتسرق يا ابنى .

العسكري : لا .. أصله حجر مخصوص بتاع الدكتور .

كاملة : طب ما تجيبوا حجر غيره للدكتور وتفوضوا .

العسكري : لا . ما هو دا أصله حجر أثري يا ست ..

كاملة : يعنى يسواله بالميت كده بيجى ميت جنيه .

العسكري : أه مامم سرقوه علشان ياخذوا المكافأة .

عزيز : انت بتتفاهم معاها ليه .. دى ولية جاهلة ماتفهمش حاجة
يلا خشى جوه مش عاوز دوشة .

كاملة : اسم الله .. لا هو انا واقفة فى ملكك .. انا ياراجل واقفة
فى ملكك .. والا ايه انا ياراجل واقفة عند سرابتى .

- **العسكري** : (بشدة) اخرسى يا حرمة وخشى جوه قطع لسانك •
- **كاملة** : قطع لسانى • انشا الله ما يتقطع لسانه الا انت •
- **العسكري** : والنبي ان ما دخلت لاضربك على وشك •
- **كاملة** : تضربنى •• انشا الله تضرب فى قلبك •
- **العسكري** : مش عاوزة تسكتى ••
- (يضرىها يكعب البندقية فى صدرها • تصرخ كاملة مستغيثة فيأتى على صراخها عدد كبير من الناس معهم شوم وعصى) •
- **اصوات** : ايه الظلم ده ••
- **عزيز** : يلا انجر يا كلب انت وهو ••
- **اصوات** : ما تشتمينش ••
- **عزيز** : اخرس يا كلب ••
- **صوت** : ما تقولش كلب •
- **عزيز** : اضرب يا عسكري •
- (العسكري يصفع أحد الناس فيرد له الصفعة وتبدأ معركة بالأيدي ينال الدكتور منها صفعة فيجرى مذعورا ويقف عند الدكة يرتعد ثم يصدر أوامر للعساكر بضرب النار • تضرب العساكر النار فى الهواء ويحدث هرج شديد ثم تجرى الناس ويختفون فى أزقة الحى ويبقى فى المسرح - الدكتور عزيز يرتعد من شدة الخوف ومعه العساكر •
- **عزيز** : البنادق متعمرة •
- **عسكري** : ما تخافش يا دكتور •• انت خايف كده ليه
- **عزيز** : انا مش خايف ولا حاجة ••
- انا لازم نحتاط للامر ••
- **عسكري** : هنحتاط من ايه •• دى ناس غلابة يا دكتور بكلمة حلوة •
• نكسبهم •
- **عزيز** : مافيش حاجة اسمها كئمة حلوة • دول ناس وحوش •
• ما ينفعش معاهم غير القوة •
- **عسكري** : بس روق آمال يا دكتور •• انت اصلك ما تعرفش الناس بتوع مصر • دول ناس طيبين طول عمرهم طيبين •
- **عزيز** : انت ما تعرفش حاجة ••

عسكري : ما اعرفش حاجة ازاي يا دكتور .. دنا باخدم بقالى
عشرين سنة .. عمرى ما ضربت طلقة غير النهاردة ..
وبينى وبينك ضربت علشان اطمنك (بضحك) حاكم
انت كنت خايف خوف ..

عزيز : انت أصلك جاهل ما تقدرش خطورة الموقف

عسكري : ولا خطورة ولا حاجة .. يا شيخ روق وصلى ع النبي
عزيز : النبي ماله ومال الحكاية دى .. انت راجل متهاون
ولا يمكن الاعتماد عليك فى مهمة زى دى .

عسكري : ما يمكنش الاعتماد على ازاي يا دكتور .. دنا بقالى
عشرين سنة خدمة عمرى ما خدت اورنيك ذنب .

عزيز : دا مش دليل على انك كويس .. دا دليل فساد الجهاز
الادارى لو فيه كادر بيسير الجهاز الادارى بالكفاءة
المطلوبة . مكنتش انت قعدت .. وع العموم انا مش حق
فى نفس الغلطة اللى وقع فيها الجهاز الادارى . ورينى
البندقية دى .

عسكري : عاوزها ليه .

عزيز : عشان استعملها فى الوقت المناسب .

العسكري : اسلمها لك ازاي .. مصيبة كبيرة لتضرب واحد رصاصة
كده وأخرتها يجرجرونى انا ع السجن .

عزيز : انت غير مسئول .. انا المسئول .. انا عندى كارت
بلائش من سيادة وزير الداخلية اتى أواجه الموقف بحزم ..
هات البندقية دى .

العسكري : اتفضل (يناوله البندقية - يمسكها)

عزيز : بتشتغل ازاي .

عسكري : تبص من الدبانة وتدوس ع التتک .

عزيز : فين هيا الذبابة .

عسكري : ذبابة دا ايه .. مفيش ذبابة .. يقولك الدبانة ..

عزيز : طب ازاي تتعلق فى الكتف .

عسكري : تتعلق كده هوه (يعلقها له ويسير الدكتور حنة وذهابا
فى خطوات عسكرية) .

عسكري : بس حاسب على بنطلونك لا يتعاص يا دكتور .
(ينظر الدكتور الى اسفل ويشمر البنطلون الى الركبة
ممسكا اياه بيديه) .

عسكري : طب وانت متحارب والا تمسك البنطلون كده .
عزيز : امال اعمل ايه .

عسكري : اربط البنطلون من تحت بدوبارة .
عزيز : واجيب دوبارة منين .

العسكري : استنى لما اشوف لك زيق مرمى هنا .
(يبحث فى الأرض عن شىء يربط به بنطلون الدكتور ثم
يعثر على قطعة حبل ويربط بنطلون الدكتور من القدمين
- ينظر الدكتور الى نفسه ويتسم مسرورا)

عزيز : فعلا كده احسن .. مافيش شك ان التجربة لها قيمتها
فى العمل السياسى .. متشكر .

العسكري : متشكر .. على ايه يا دكتور .. دى حاجات بنتعلمها
واحنا عيال .. ايام ما كنا بتلعب عساكر وحرامية
(يجلس العسكري على الدكة ويتحدث) - والله كانت
ايام .. تعرف يا دكتور كنا عيال صغيرة فى بلدنا .
الواحد طوله يمكن شبرين .. لكن كنا عفاريت .. وكنا
بتلعب لعبة العسكر والحرامية دى .
(يتوقف العسكري عن الحديث لحظة ليشعل لنفسه
سيجارة بينما الدكتور عزيز بالبندقية والبنطلون المربوط
يذهب ويجيء فى الساحة غير ملتفت لكلام العسكري
يشعل العسكري سيجارة ويأخذ نفسا عميقا ويستأنف
الحديث) .

العسكري : وكان معانا واد خواجه زى حضرتك كده اسمه ونجت
كان الخالق الناطق شبيهك بالظبط .. لكن عليه منظر زى
حضرتك كده بالظبط .

(يقهقه عاليا - يتوقف الدكتور عزيز عن المشى وينظر اليه
ساخطا ثم يصرخ بشدة) .

عزيز : اخرس .. انت بتهزر معايا وللا ايه .
(ينتفض العسكري مذعورا ضاربا سلاما للدكتور)

العسكري : عدم المؤاخذه يا دكتور .. انا قلت نتسلى يعنى واحكيك
حكاية .. انت واخذ الحكاية جد .. انا كنت باحسبك
بتلعب .

- عزیز :** (يشوح بيده فى وجه العسكرى) العب يا طور
العسكرى : طيب حاسب ما تشوخش كده احسن البندقية معمرة
ويصادف الظرف يطلع كده ولا كده تبقى مصيبة .
- عزیز :** (غاضبا) اقع
(يجلس العسكرى صامتا ويتمشى الدكتور فى خطوط
عسكرية ثم يتوقف فجأة ويسال العسكرى)
- عزیز :** البندقية معمرة ؟
(يقف العسكرى ضاربا سلاما)
- العسكرى :** أيوه يا أفندم .
- عزیز :** طيب اقع (يتمشى من جديد جيئة ونهابا ثم يتوقف فجأة
امام العسكرى) .
- عزیز :** انت متأكد أنها معمرة .
- العسكرى :** (يقف ضاربا سلاما) أيوه يا أفندى
- عزیز :** طيب خد فضيها واديها تانى .
- العسكرى :** فضيها انت يا دكتور .. شد الترياس وفضيها
- عزیز :** أنا ما أعرفش حاجات زى دى .. ترياس ودبانة - وكلام
فارغ زى ده .. أنا راجل عالم ..
- العسكرى :** عدم المؤاخذه يا دكتور .. هات ..
(ياخذ البندقية من الدكتور عزيز .. يخرج الظرف ويعطيها
له فيعلقها على كتفه ويعود من جديد الى خطراته
العسكرية - يدخل الأستاذ جلال - الصحفى ومعه المصور
واحد من جريدة البوق . عندما يشاهد جلال الدكتور ينفجر
ضاحكا فينظر الدكتور نحوه فى غضب) .
- جلال :** ايه الحكاية .. هتعملوا فيلم وللا ايه يا دكتور .
- الدكتور :** (غاضبا) ايه .. مضحكة وللا ايه .. عيب تقول كلام
زى ده .. الكلام دا تقوله هناك فى الجورنال بتاعك .
لشوية عيال صحفيين زيك .
- جلال :** الله .. انت زعلت يا دكتور
- الدكتور :** معلوم لازم أزعل .. أمال ناهم ايه .. المسائل بسيطة
بالشكل دا .
- جلال :** أنا مش قصدى أهينك يا دكتور أو أرح شعورك ..
بالعكس دنا عارف انك متضايق حبيت أضحكك .

الدكتور : مش دا الوقت المناسب للضحك .

جلال : ع العموم انا سعيد جدا اللي كلامنا بيتحقق على طول الخط .. ادى أنت أخيرا أمنت بأن العنف هو - محرك التاريخ وأدى أنت واقف فى صف الشعب مش بلسانك بس لا بيندقية كمان .

الدكتور : شعب ايه دا اللي انت بتتكلم عنه .. دول ناس حرامية سرقوا الحجر الأثرى اللي بيكشف عن فترة غامضة فى تاريخ مصر ..

جلال : مين هما اللي سرقوه .

الدكتور : العيال دول اللي بيقتعدوا هنا .

جلال : ما لقيتوش لحد دلوقت ..

الدكتور : وهنلقاه فين .. لازم باعوه لواحد م السواح بكام جنبه منتهى الجهل .

جلال : يا سلام لو كان موجود .. كان هوه اللي حابه لكه .

الدكتور : مين هو دا ..

جلال : العلم رضوان ..

الدكتور : (سعيدا كأنما عثر على فكرة مدهشة) رضوان .. هو زعيم الصرايمية دول .

جلال : بالعكس دا راجل طيب .. وهو اللي يحل الموضوع كله .

الدكتور : رضوان مافيش غيره ..

(يخرج أجنده من جيبه وينظر فى رقم معين)
- كويس قوى .. فكرة مدهشة .. عن اذنكوا لحظة ..
انا هاجيبوا هنا مربوط فى حديد .

جلال : لا .. حديد ايه ويتاع ايه .. دانننوا تجيبوه بالذوق .

الدكتور : من فضلك .. ما تتدخلش فى الموضوع ده .. انا معايا كارت بلانش من سيادة وزير الداخلية .. كارت بلانش اتصرف زى ما انا عاوز .

(ينصرف الدكتور مهرولا ليتصل تليفونيا بالمأمور ويجلس جلال على الدكة المقابلة للدكة التى يجلس عليها العسكرى ويجواره المصور) .

جلال : مصيبة كبيرة على دماغ المعلم رضوان .

المصور : تفنكر مريضه .

جلال : مريضه لحد ما يعترف .. وبالطبع هو ما يعرفش حاجة

المصور : يبقى مريضه لحد ما يموت .

جلال : ياريت .

المصور : ياريت .. انت بتقول ياريت .

جلال : طبعا ياريت .. اما يموت المعلم رضوان هيبقى شهيد

ومنعمل ضجة كبيرة فى البلد .. وهنستغل الموقف على

احسن صورة .. هننشر صورته على خمس اعمدة

ومنكتب عنه كل يوم لمدة شهر . مقال من نار .. انا

- واثق ان التوزيع هيرتفع لعشرين الف نسخة .

المصور : بقى انت مش همك فى موت المعلم رضوان غير المانشت

والمقالات اللى من نار .. والتوزيع اللى هيرتفع لعشرين

الف نسخة .

جلال : امال انت عاوز يهمنى ايه فى موت المعلم رضوان اظن

هاهتم بالجنازة والخارجة والكلام الفارغ ده ..

المصور : انت بتسمى الحاجات دى كلام فارغ .

جلال : طبعا كلام فارغ . انت راجل عاطفى ما تنفعلش فى اى

حركة سياسية .. بتستهدف تغيير الأوضاع .

المصور : هيه فين الأوضاع اللى احنا غيرناها دى .. احنسا مش

عارفين نغير الأوضاع اللى فى الجورنال . دا الجرنال اللى

مكتوب على الصفحة الاولى بتاعته فى سبيل عالم افضل ..

بيموله واحد اقطاعى .

جلال : وفيها ايه .. من واجب الحركة السياسية ان تستفيد حتى

من اعدائها .

المصور : بقى معقول الراجل اللى عنده عشرة مليون ويبجى الف فدان

يعمول جريدة تستهدف تغيير الأوضاع .

جلال : انت لسه صغير فى السياسة .. مش قاهم حاجة ابدأ ..

المصور : وانت اللى قاهم بشرحك ..

جلال : طبعا .. مش بس كده .. دا ما فيش بيفهم غيرنا احنا ..

المصور : انتو مين .

جلال : الشعب المصرى

المصور : السبع أنفار اللى انت عامل معاهم تنظيم .

جلال : السبع أنفار اللى مش عاجيبك دول همه الطليعة .

المصور : النصابين .

جلال : بتقول ايه .

المصور : بقول همه النصابين .

جلال : ازاي تجرؤ وتقول كلام زى ده .

المصور : دا انا هقول أخطر من كده لو حبيت

جلال : انت مفصول .

(يهب جلال واقفا)

بس دى غلطتى أنا . . انت كان لازم تنفصل من زمان . .
انت عندك تطلعات طبقية وانحرافات برجوازية . . انت
بوليس . . اتفضل بقى يا أستاذ .

المصور : اتفضل انت . . أنا قاعد هنا . .

جلال : قاعد هنا تعمل ايه . .

المصور : هاقعد هنا علشان أفضحك . . لازم أكشفك للناس
الطيبين دول . .

جلال : مش هتقدر . . أنا اللى هأفضحك وأعريك . .

المصور : مش هتعرف . . لو قعدت تتكلم عشرين سنة مش هيفهموك
انت نصاب .

جلال : أنا نصاب . .

المصور : وستين نصاب كان .

جلال : (مرتبكا) . . طيب أنا هعرفك وهأوريك . . يا أهبل . .

المصور : طيب أجرى بقى أحسنك قبل ما أكشفك للناس وأخليهم
ياكلوك . .

جلال : كده . . طيب أنا هأوريك . .

جلال : (ينصرف مذعورا فيصدم وهو يجرى بام عنان)

أم عنان : ما تفتح . . انت عميت . .

جلال : باردون يا مدام . .

أم عنان : مدام .. المدام خطفت عزب يا خويا .. سكن معاماً في
الزمالك ..

(يجرى جلال الى الخارج وتدخل أم عنان مضروبة
وملايسها ممزقة ويبدو عليها الاختلال)
- عزب بتاع الفن الشعبي سكن الزمالك .
5 - : (تظهر عند الباب) .. جالك كلامي ..

أم عنان : (تحدث نفسها) استنيت على باب العمارة .. بقى يركب
عربييات الموكوس .. والمصيبة انه بيرطن لكن على مين ..
دنا اديته علقة حيحلف بيها طول عمره .
(تقيس المسافة بقدمها)

هنا المسرح .. هنا الجمهور .. هنا عبد الوهاب
وأم كلثوم .
(تضحك) الراجل العمرة سكن في الزمالك .. ايه اللي
عاجبو ياخواتي في المعصصة دي .
(تبكي)

خد اللي ورايا واللى قدامي يا ناس
(تتوقف عن البكاء) هنا المسرح هنا عبد الوهاب
وأم كلثوم .
(تبكي)

هنا الجمهور .. هنا المسرح .. هنا عبد الوهاب
وأم كلثوم .

العسكري : انت يا حرمة مش هتبطلي جنان بقى ..
أم عنان : (للعسكري)
عزب الجريان سكن الزمالك ..

العسكري : ما تبطلي خوته بقى .. هرشتي مخي ..
أم عنان : (صارخة باكية) ..

ايه .. عاوز ايه منى انت راخر .. حتضربني زى العسكري
اللى واقف على باب العمارة .. عاوزين منى ايه .. انتو
بقى عايزين منى ايه .
(تهجم عليه)

العسكري : يخرب بيتك .. كده قطعتميلي الزكثة .. طب والله مانا
عاتقك يا مجنونة يابنت المجانين .

- (يجرها نحو الخارج وهي تصرخ)
أم عثمان : سيب يقولك .. اوعى احسنك
 (تدير وجهها للساحة) .. كده المسرح وكده الجمهور
 كده غيد الزهاب وام كلثوم
 (تظل تردد هذه العبارة حتى تغادر المسرح)
 (تخرج كاملة بعد ذلك تقلدها فيصرخ فيها العسكري
 صرخة مدوية) ..
- عسكري**: انت انهرشتى فى مخك انت رخره وللا ايه
كاملة : انت بتزق كده ليه خوفتنى
عسكري : بقى انا اخوفك انت يام قويق .. دانتى تخوفى بلد
 بحالها
كاملة : ليه بقى يا عسكري .. ماحناش قد المقام وللا ما حناش
 قد المقام ..
عسكري : انجري ياولية غورى من هنا
كاملة : اغور من هنا يا خويا انا واقفة قدام ملكى .. واقفة
 قدام سرايتى يا خويا ..
عسكري : قسما بالله العظيم ان مانجريتى لساحبك زى الولية دكته
 على مستشفى المجازيب
كاملة : (تجرى نحو بيتها) ..
 روح انشا الله تبقى تتجنن وتاكل فى همدوك يا بعيد
 (تغلق الباب بشدة)
عسكري : (ناظرا للمصور)
 انت قاعد ليه ياجدع انت ..
المصور : (ساهما) .. قاعد
عسكري : انت مع الحكومة وللا مع الشعب
المصور : (ساهما) .. انا ؟
عسكري : ايوه انت
المصور : انا مع الحقيقة
عسكري : تبقى مع الحكومة .. خليك قاعد بقى .. معاكش سيجارة
المصور : لا والله ما بادخنش

عسكري : ما بتدخنش ولا مفلس

(يضحك)

حاكم الماهية مابقتش تستحمل ، وحياتك لما بتفضل خمس
تيام ٠٠ الا احنا بقينا كام منه النهاردة

المصور : النهاردة ٠٠ ٢٢ يا شاويش

عسكري : ياه ٠٠ دى الايام بتقوت بسرعة يا عالم ٠٠ اهر كله من

عمرنا ٠٠ شوف اهر زى النهاردة كدة من ٣٠ سنة خلقت

الواد حسن ابنى البكرى ٠٠ هو مولود فى ٢٣ يوليه سنة

١٩٢٢ مش بيبقى ٣٠ سنة مطبوط برضه

المصور : مطبوط يا شاويش

عسكري : اهر كان عندى أيامها ٢٨ سنة ٠٠ بيبقى انا عندى ٥٨

سنة ٠٠ فاضللى سنتين وأخرج على المعاش وكمان سنتين

وتتوكل على الله

المصور : ربنا يديك العمر الطويل

عسكري : أعمل بيه ايه ٠٠ يا راجل قول يا ياسط ٠٠ دا الموت سترة

٠٠ طب والله العظيم الموت سترة ٠٠ عارف الناس اللي

بتخاف م الموت دول ٠٠ ناس عبط ٠ دا الموت حلو قوى ٠٠

بس ربنا يجعل أخرتنا حلوة

(يدخل الدكتور عزيز وعدد من العساكر ومعهم المعلم

رضوان وكبارة ورمضان)

رضوان : احنا سبينالكو الحتة وقلنا نقعد فى حالنا ٠٠ برضه

ورانا

صحيح رضينا بالظلم ٠٠ والظلم مش راضى بينا

رمضان : والنبي يايبه انا ما عملت حاجة ٠٠ انا راجل صاحب

عربية والنبي يايبه ٠٠

كبارة : الواحد بقى مستقيم قوى اليومين دول ٠٠ من الحتة

للسجن ومن السجن للحتة

(يجلس الثلاثة على الدكة وامامهم حرس)

المصور : فين الحجر

رضوان : والله انا عمرى ما عرف ايه الحجر ده ولا شفته

المصور : طب فين الواد ابو سريع

رضوان : الواد ابو سريع تلاقوه فى شارع المشواربى بيلعب التلات

ورقات

عسكري : دورنا عليه ما لقنا مش .. هو بينام فين .
رضوان : كان بينام في الفسقية .. ودلوقت تلاقوه بينام في
الخرابة .

المأمور : فين الخرابة دي ..
رضوان : ورا الفسقية .. بس فيه هناك حيلة من غير مؤاخذة تبقوا
تنتطوها .

المأمور : روح مع العساكر وريهم مكان الخرابة ..

رضوان : (وهو يتأهب للانصراف)
العساكر كسرولى العربية يا بيه .

المأمور : انجر امشى .. بلاش دوشة ..

رضوان : حاضر .. حاضر ..

(ينصرف رمضان ومعه العساكر)

المأمور : يعنى كده يا رضوان مش عاوز تتكلم .
رضوان : انا يا بيه مستعد اتكلم ع الحاجة اللي شفقتها .
المأمور : طب اتكلم .

رضوان : بقى انا اول ما عرفت الخبر ده خدت بعضى ورحت للبي
مدير الأمن في الداخلية .

المأمور : يعنى انت بلغت مدير الأمن .

رضوان : طبعا بلغته بكل حاجة .

المأمور : الكلام ده انت مستؤل عنه .. واذا ما كنتش بلغت سعادة
مدير الأمن حتتاسب حساب عسير .

رضوان : زى ما باقولك كده .

المأمور : وقال ايه سعادة البيه .

رضوان : بعد ما حكيت الحكاية .. اتجسس في الكرسي كده ويصلى
وقال : هنبحت الأمر .

المأمور : طب ازاي ما بلغناش باشارة علشان نتخذ الاجراءات .

رضوان : ما هو بلغكرو وانتو اتخذتو الاجراءات .

المأمور : اجراءات ايه اللي اتخذناها .

رضوان : جيتوا تهدوا الصتة .. عملنا عركة ورحنا في دامية .

المأمور : الله .. انت بلغت سعادة مدير الأمن عن ايه عن سرقة الحجر .

رضوان : سبحان الله يا سعادة المأمور انا لا عرف حجر ولا عمري شفته .

المأمور : امال بلغت عن ايه .

رضوان : عن عبارة الهدد دى .

المأمور : انت فاهم انك حدق يعنى .. عايز تقلب الموضوع علشان ما تتكلمش .. طيب يا رضوان دلوقت ميظهر الحجر والواد ابو سريع ومتشوف اللي هيجرالك (للدكتور) تعالى يا دكتور اما نلحق القوة اللي بتفتش فى الخرابة .
(ينصرف ومعه الدكتور) .

رضوان : عجائب .. هما عاوزين يضربونا وبس

كسارة : هيضربونا ليه .

رضوان : ايش عرفنى .. ما تنكتم انت راخر .. لكن دا مين دا .. على الحرام يانا يا العساكر الدور ده .

كسارة : يا خسارة لو كنت لسه مخاوى النهاردة .. كانت الست فكتنى ونزلتنى على تحت .

رضوان : ياخى بطل هرشة مخ انت راخر .. ست انه اللي انت ماسكها لنا دى ..
هو فيه جن الا بنى آدم ..

(يدخل عزب متجها الى بيت ام عنان)

عزب : يا ست ام عنان .. يا ست ام عنان ..

كاملة : (من على باب بيتها) ام عنان انهبلت فى عقلها ياخويا ..

عزب : بتقولى ايه يا ولية انت ..

كاملة : بقولك ام عنان انهبلت ..

عزب : طيب انكتمى انت .. حد سالك ..

كاملة : انكتم دا ايه .. لهوا انا واقفة فى ملكك .. انا واقفة فى ملكى يا خويا .. سرايتى يا خويا .. ما جدش شريكى انا اتكلم على كيفى .. والنبي لا تكلم على كيفى .

عزب : طيب اتكلمى انشالله حتى الصبح .. جتك باهية .

كاملة : الا ايه .. هنا الجمهور .. هنا السرح .. هنا ام كلثوم

وعبد الوهاب .

(تضحك)

• (يلمح عزب المعلم رضوان)

عزب : الله .. مساء الخير يا معلم رضوان .

رضوان : مساء الخير يا استاذ .

عزب : ايه الحكاية دى .. الحى ماله اتشقلب حاله كده .

رضوان : اهو كل شىء اتشقلب ..

عزب : وانت مالك قاعد كده ليه ..

رضوان : علشان الحجر ..

عزب : حجر .. حجر ايه مش فاهم ..

رضوان : ولا انا فاهم وحياتك .

عزب : مشفتش ام عنان .. ما تعرفش راحت فين .

المصور : ام عنان زمانها فى مستشفى المجازيب .

رضوان : ليه سرقت حاجة رخرة ..

عزب : انت متأكد ..

المصور : ايوه .

عزب : (يجلس) .. مسكينة .. مشروع فنانة عالمية ماكملش ..

كاملة : انت قعدت مطرح عبد السلام .

عزب : بقى ام عنان تروح المستشفى .. والولية المجنونة دى

طلقينها بره كده زى الكلبة المسعورة .

كسارة : بكره تفوت عربية الكلاب ويلموها .

عزب : انت بتتكت يا كسارة .. مش مكسوف من نفسك .. انا

مش مديك خمسين قرش علشان متقولش حاجة لام عنان .

كسارة : ومين قال انا قلت .. انا فى السجن من نهار انت ماخذت

الولية الذواتى .

كاملة : انا اللى قلت .. انا اللى قتلتها على كل حاجة .

عزب : يا خسارة يا ام عنان .. انا كنت حاемك هزة فى مصر .

كسارة : لكن الولية الذواتى فين يا استاذ ..

عزيب : راحت في ستين داهية .. مدرب الكيروكيه بقاعها رجع
رجع من باريس واصطلحت معاه .

كبارة : يعني مش راجعة تاني ..

عزيب : لا .. خلاص ..

كبارة : (يضحك) .

كانت جاية ترفع الفقرا ل .. وشها كان نايدي علينا قوي
من نهار ما جت والاقلام نازلة ترف .. على قفايا ..
لو كانت رجعت كنا اترفعنا اكثر من كده .. كنا
اتشققنا .

عزيب : يا خسارة يا ام عنان ..

رضوان : الا عبارة هنبعث الامر دي ..

كاملة : انت قعدت مطرح عبد السلام ليه .. هو يش جاي .

عزيب : يا سلام .. انا كنت حاسس بنفسي لو استمرت شهر في
الزمالك كمان كنت تحولت لجثة .

(يستنشق الهواء ملء رئتيه) .. يا سلام هنا الواحد
بيشم ريحة مصر .. بيحس بيها .. بروح مصر طالعة
من تحت الارض .

المصور : انت ساكن هنا يا استاذ .

عزيب : لا .. انا ساكن في العجوزة .

كاملة : والنبى انت قعدت مطرح عبد السلام ليه .. هو مش قال
انهم مش هيهدوا يا خويا .

(يدخل المأمور يكتب وعزيز والعساكر وأبو سريع يحمل
الحجر)

ابو سريع : تشتري الواحد بجنيه وأنا اجيب لك كل يوم خمبة .

ابو سريع : يا سعادة البيه دا الحجر احنا قاطعينه م الجبل وناقشينه .

الدكتور : اخرس .. انت لص آثار .. دا حجر تاريخي انت
ما تعرفش قيمته .

ابو سريع : طيب اذا كان تاريخي وانت شايف كده .. انا مستعد كل
يوم اجيبك واحد زيه .

الدكتور : (يتحسس النقوش)

ابو سريع : خواجة دا النقش ده انا اللي ناقشه .

عزيب : اخرس لص آثار .. دا حجر يساوي ملايين الجنيهات .

المأمور : اخرس ياواد .. شيل الحجر ويللا قدامى .
رمضان : الحمد لله إلیی طلعنا براءة ..أنا بس كان مالى وماں
الحكاية دى .. أنا راجل صاحب عربيہ .

رضوان : وبقي الشغلة دى كلها ووجع القلب دا كله عشان حتة
حجر .. دا البنى آدم بيضيع ماحدث بيدور عليه .

المأمور : يللا يا عسكري .. اتفضل يا دكتور .. يللا يا رضوان
يللا يا واد أنت وهو اسحبهم يا عسكري .

رضوان : يسحبنا على قين ؟

المأمور : ع القسم .

رضوان : لأ وشرفك ..

المأمور : لأ ليہ ؟

رضوان : مش رايح القسم .

المأمور : حتروح غضب عنك .

رضوان : ولا غضب عنى ولا بخاطرى

عسكري : (ممسكا به من كتفه) .. ايه قصدك .. متعصب يعنى .

(يضرب رضوان يد العسكري بشدة)

رضوان : اوعى ايدك دى .

عسكري : وكمان بتضرب .. دا أنت نهارك أزرق .

(يبك العسكري حزامه) .

رضوان : خليه فى وسطك أحسن .

العسكري : أنت بتهددنى .

رضوان : طب واللى خلق الخلق ان قلعته لاسرك وسطك ..

المأمور : جرجروه على القسم .

(يهجم العساكر على رضوان يصدهم جميعا - تنشب

معركة حامية بين العساكر وبين رضوان واهل الحنى .

- ينتصر فيها اهل الحنى ويأسر رضوان بعض العساكر

ويجربى المأمور والدكتور ويبقى كجارة ورمضان ورضوان

وأبو سريع ومعه الحجر ويبنى المعلم رضوان

• القيادة)

رضوان : (بحزم) دخلوا العساكر دول بيت أم عنان •

عزب : (صارخا) لا • لا •

رضوان : لأليه •

عزب : العساكر ما تخشش بيت أم عنان أبدا •

رضوان : ليه يعنى ؟ بيت المال يعنى • اللى أقول عليه هوه اللى

يتنفذ •

عزب : يا معلم رضوان ما يصحش • بيت أم عنان ده حيثحول

فى يوم من الأيام الى متحف •

رضوان : (مستهزئا) متحف • والمتحف دا تحتط فيه ايه اياك

حجر الواد أبو سريع •

اللى بقوله أنا هو اللى صح • فاهم •

عزب : (متراجعا) • على كل أنا مش هناقشك دلوقت يا معلم •

رضوان : لا دلوقت ولا بعدين • خش يا عسكرى أنت وهو •

(يدخلون) •

اقفل عليهم ياواد يا رمضان •

عزب : طيب • طيب أنا كنت عاوز استاذن • مفيش سنكة هنا

الواحد ينفد منها •

رضوان : طيب مالشعب كله هنا هه • والا أنت مالكش غير

فى الرقص •

عزب : أنا • أنا يا معلم رضوان •

رضوان : أنت ايه وبتاع ايه • جاك داهية • بس شاطر تتكلم زى

البرابند • خده يا واد يا أبو سريع نططه من الخرابة

اللى هناك •

عزب : أنا متشكر • متشكر • متشكر • قوى •

(يجرى عزب خلف أبو سريع ناحية الخرابة)

رضوان : (ناظرا فى أعقابه) اخص عليك راجل بليه • عامل

زى الخروف المفلوف •

(للمصور) • وانت يا استاذ • مش عاوز تهرب

انت راخسر •

- المصور :** لا يا معلم رضوان .. انا قاعد معاكم هنا .
- رضوان ؟:** ليه .. انت مش تبقى الجدد بتأخ المنشورات السرية .
- المصور :** لا يا معلم رضوان .. انا راجل مصرى وفنان .. واهلى ناس زيكو كده بالظبط . وكان عندي أمل اعمل حاجة للناس .. لكن ما عجبهمش .. قالوا عنى عندي انحرافات برجوازية .
- رضوان :** اهي الارتوازية دى اللى جابت لنا الكافية هيه وعبارة منبخت الامر .. ع العموم انت راجل جدد باين عليك ..
- المصور :** انا حققت معاكم على طول ..
- رضوان :** فتح عينك انت وهو طول الليل .. همه مش حبيطلوا تانى وتالت كمان مش حيقدرنا يعملوا حاجة طول م العساكر دول فى ايدينا .. بس اوعى حد منهم يقلت .
- (تفتح نافذة فى شقة أم عنان ويطل منها عسكري)
- عسكري :** يا معلم رضوان دا احنا معاكم .
- رضوان :** بطل غلبة واقفل الشباك ده ..
- العسكري :** وحياة سيدي المدبولي احنا معاكم .. بس نعمل ايه دا احنا غلابة احنا عبد المأمور .. الود ودنا نمسك البنادق ونقف معاكم .
- رضوان :** قلت بطل غلبة واقفل الشباك (لكبارة) وانت ياواد يا كبارة ..
- كبارة :** نعمين يامعلمي .
- رضوان :** خللي بالك م الشارع ياواد .. اطلع على سطوح كاملة فوق بس اوعى تنام .. وحياة سيدي النبي اقطع رقبتك ..
- كبارة :** ما تعتلش هم يا معلم رضوان (مبتهاجا)
- يا حلاوة ايامك الحلوة يا معلم رضوان .
- رضوان :** (باكيا) انا مالى انا بس يا معلم رضوان .. انا صاحب عربية والله العظيم .
- (يعود أبو سريع وعزب مستند عليه)
- رضوان :** انت جايب الرزية دا ليه هنا تانى ؟
- أبو سريع :** بينظم الخرابة وقع انكسرت رجله .
- رضوان :** طب لقحه عندك هنا فى ليلته المهيبه دى احنا كنا ناقصينه راخر .

(عزب ينظر وهو يتأوه ثم ينظر الى الجرح الذى فى قدمه ويتالم)

عزب : عيالى لسه صغيزين ٠٠ سبع عيال يا معلم رضوان مالهمش حد فى الدنيا دى غيرى انا ٠٠ وعشان لقمة العيش ادى احنا بنخطف ونجسرى ونصرخ ونلف زى الدبابير ٠٠ كل دا' علشانهم ٠٠ وحياتك لو كنت بطولى ٠٠ يمكن كنت اعمل عمل كبير ٠٠ عمل خالد عمل يعيش الف سنة ٠٠ الفين سنة ٠٠ لكن سبع عيال يا معلم رضوان ٠٠ مشكلة ٠٠

ابو سريع : انت متحللنا تاريخ حياتك ٠٠ ما تبطل انت راخر ٠

عزب : انا يا معلم ابو سريع واحد منكرو ٠٠ واحد زيكو بالظبط ٠٠ ما يفركتش اللبس ٠٠ دا اكسسوار عشان ننصب بيه ٠٠ المجتمع كله بيعيش ٠٠ بينصب ٠٠ وعشان نعيش لازم ننصب معاه وننصب عليه

ابو سريع : امال يعنى احنا بس اللى وقعنا من قعر القفة ٠٠ بننصب على خواجات مش على ولاد عرب وكمان مش عاجبهم والا الواد الراجل الدكتور المجنون ده بتاع الآثارات قال ايه بيت عبد الفتاح ٠

عزب : ما هو راخر بينصب يا ابو سريع ٠٠ الناس كلها بتنصب اللى بينصب بتلات ورقات ٠٠ واللى بينصب بشهادة ٠٠ واللى بينصب بكتاب ٠٠ واللى بينصب بكلام ٠٠ كلهم نصابين ٠

المصور : مش حقيقى الكلام ده يا استاذ ٠٠ فيه ناس اشراف كتيرة يا استاذ ٠

عزب : معاك ٠٠ بس هما فين ؟

المصور : موجودين ٠٠ بس انت ما دورتش عليهم ٠٠ مشغول عندك سبع عيال ٠

(يفتح شباك بيت أم عنان ويطل منه عسكرى)

العسكرى : وقفونا معاكو تحت نشم شوية هوا معاكوا ربنا يخليك ٠٠
رضوان : انكتم يا عسكرى مش عاوزين دوشة ٠

العسكرى : يا عالم هاموت من الحبسة دى ٠٠

رضوان : قلت لك انكتم واقفل الشباك دا احسن لك (لمصور) الساعة بقت كام يا استاذ ٠

- المصور :** الساعة ٢ بعد نص الليل يا معلم
- رضوان :** ربنا يفوت الليلة دى على خير
(يتكلم على بقايا عربية رمضان ومعه بندقية عسكري - يظلم المسرح بالتدريج حتى يسود الظلام فتصرخ كاملة صرخة مدوية وتبدأ الأنوار وتشع بالتدريج ويهب المعلم رضوان وكل الرجال الذين فى المسرح - ويفزع عزب ويقوم نصف قومه)
- رضوان :** ايه الحكاية ٠٠ ايه يا كاملة العساكر جم ٠٠
كاملة : هم جم بس يا خويا ٠٠ دول جم وسكنوا فوق
- رضوان :** الله يخرب بيتك ولية مجنونة سقطى قلبى ف ركبى انت مش حتبطللى الخانكة بتاعتك دى
- كاملة :** خانكة ٠٠ لا ٠٠ الا كده يا معلم رضوان ٠٠ ال خانكة ال
- رضوان :** يا ولية يا مجنونة دا احنا اللي حابسينهم فوق
- كاملة :** تحبسهم ٠٠ ومش عيب يا معلم رضوان تحبس أربع رجالة مع حرمة ٠٠ تحبسهم ازاي يا خويا مع حرمة
- رضوان :** بقى انت حرمة انت ٠٠ يا ولية خشى وخالى ليلتك دى تقوت على خير
- كاملة :** لا والنبي منا خاشة جوه ياخويا ٠٠ انا قاعدة معاكو هنا ٠ دول أربعة والشيطان شاطر
- رضوان :** طب روى اتلقى جنب الأستاذ عزب
(كاملة تنظر لعزب وتضحك)
- كاملة :** مين ٠٠ انت قعدت مطرح عبد السلام
- عزب :** غورى ٠٠ دامية تاخذك ٠٠
- كاملة :** انت قاعد عند بيتنا وبشتمنى
- عزب :** أهم بكره يهدوه ٠٠
- كاملة :** والنبي ما يهدوه ٠٠ ولا هييجوا جنبه انا عارفة س حمدى القمندان راح فين ياما قللى مش يهدوا
- رضوان :** يا شيخة خوتينا بسى حمدى القمندان بتاعك ده ٠٠ ما تبطللى هرش مخ بقى ٠٠ قلتك اقعدى جنب الأستاذ عزب وانكتمى

- (تذهب الى جوار عزب وتجلس)
 رضوان يعود الى مكانه وتخفت الأضواء)
- رضوان** : ياد يا رمضان - يظهر انهم مش جاينين غير الصبح أنا
 هاغمض عيني شوية كده .. خدوا بالكم كلكم .
- رمضان** : احنا آخر المسطة يا معلم رضوان .. ولا يكون عندك
 اى فكرة .
- (المسرح هادىء والأضواء خافتة) يفتح شبك أم عنان
 ويطل العساكر)
- العسكري** : يا معلم رضوان احنا فى عرضك .. احنا منكو .
- رضوان** : الله يخرب بيتكو يا اولاد الهرمة .. طيب قسما برب العزة
 ان ما سكتوا لاكتفكروا وأرميكو فى الخرابة .
- (يشعل المعلم رضوان سيجارة ويشفط نفسا عميقا ويرنو
 بصره الى قمم العمارات الشاهقة التى تطل على الحى
 البائس . ويسرح فى أضواء النيون المبهرة التى تنطفئ
 وتشتعل ملقية على الحى أضواءها التى تصل خافتة تثير
 الشجن وتلهب الخيال - يتنهد المعلم رضوان يأسا محدثا
 نفسه بصوت مسموع)
- بقى يعنى يا اولاد الهرمة لازم تهدو الربع ؟ والناس اللى
 مدرياها الحيطان دى هاتروح على فين ؟
- أبو سريع** : (محدثا نفسه) قال ايه ؟ بيت عبد الفتاح .
- رضوان** : ما الدنيا واسعة قدامكم أه .. ما لقتوش يعنى غير حثتنا
 تعملوا فيها جنينة .
- رمضان** : اهى جت فوق دماغى وكسروا العربية .
- كسارة** : يا سلام لو كنت مخاوى لحد الوقت ما كنتش اتحوجت
 لبنى آدم .
- عزب** : سبع عيال لولاهم .. أنا كنت عملت عمل كبير يعيش ميت
 ألف سنة .
- المصور** : ماحدث كويس أبدا فى البلد دى غير السبعة اللى معاه ،
 الناس كلها بوليس وجواسيس أو عندهم تطلعات
 برجوازية .
- رضوان** : ما حدث جاب للبلاد دى الكافية غير ابن الهرمة الملك
 واللى حواليه .

كلمة : (تضحك) هنا أم كلثوم .. هنا عبد السلام انشالله

تلكميس .

المصور : عشر سنين وأنا بابحث عن الحقيقة .. الدليل بتاعى كان
نصاب توهمى .. لكن الحمد لله أخيرا لقيت الطريق ..
مصر مش ناقصها النهاردة غير راجل .. راجل جدع
واحد شارب من مية البلد دى .. واحد بس يضحى
بدياته علشان ينقذ الأمة والبلد دى وولاده .. وياما
جابت جدعان على طول التاريخ .

رضوان : لا .. واللى زاد وعاد حكاية فنبحث الأمر دى !

عزب : ياناس خلونا ننام .. انا رجلى بتزن على ، خَلُونَا نَفَام،
(تنطفىء الأنوار ثم تعود الأضواء كالصبح وهم مازالوا
ناثمين - كيارة ينظر من فوق السطوح ويفرك فى عينه
ويصرخ)

كبارة : يا معلم رضوان .. يا معلم رضوان ..

رضوان : ايه الحكاية يا واد .. فيه هجوم علينا .

كبارة : هجوم ايه يا معلم .. والشمس بقت فى وسط السما ..
مش تقوموا علشان نطفر .

رضوان : الساعة كام دلوقت ياواد .

المصور : الساعة حداش ونص يا معلم .

رضوان : ياه .. دول رخرين .. اتأخروا قوى الميعاد كان
النهاردة . والهد كان لازم يبدأ م الساعة سابعة .

عزب : النهاردة الناس كلها مشغولة يا معلم .. فيه احتفال كل
سنة وانت طيب .

رضوان : اه .. هيخلصوا الاحتفال ويجيبوا العساكر ويجو على
هنا .

رمضان : (باكيا) والعمل ايه يا معلم رضوان ؟

رضوان : العمل هاتموت ، هيدغدغوك زى عزيزتك .

رمضان : (ينفجر باكيا) .

رضوان : بتعيط ليه دلوقت .. ما انت هاتموت جنب عزيزتك .

أبو سريع : بقى كل ده علشان الحجر يا ناس ؟

المصور : دا اللى باين على السطح هو الحجر لكن تحت الحجر ياما
حاجات كتير مستخبية يا أبو سريع .

كاملة : هايهدوا يا خويا ؟

رضوان : ما تغورى كده يعيد عنا .. جتك دامية .
(يلتفت للمصور) .. وانت ايه رايك يا استاذ نكاح
وللا ايه ؟

المصور : طبعا .. ما دام جايبين يهدوا الحتة .. يبقى لازم نمنعهم
يا معلم .. ويدل ما نتهزأ نموت بكرامة أحسن .

رضوان : خلاص .. نموت فى ستين دامية .. ولكل أجل كتاب ..
بس يا خسارة ياما كان نفسى أعيش لما انتقم .

المصور : مش مهم تعيش انت بالذات يا معلم رضوان .. مش
مهم نعيش احنا كلنا .. ولادنا هايعيشوا وينتقموا .
(يفتح شبك من بيت أم عنان ويظهر منه عسكري)

عسكري : يا معلم رضوان ..

رضوان : مش هاتقل بقك دا يا عسكري .

عسكري : يا معلم الساعة بقت اتنين ونص ولسه ما فطرنش
مصارينى بتزقزق .

رضوان : واللى خلقك .. ما انت دايقه .

كبارة : عربيات مليانة عساكر كثير وجاية ع الناحية دى يا معلم
رضوان .

رضوان : كام عربية ياواد يا كبارة .

كبارة : دى عربيات مالهاش اول من آخر يا معلم .

المعلم : اتشهدوا على روحكركم .. واللى هاييموت يبقى شهيد
.. واللى هايعيش ها يشوف الهنا كله .

عسكري : العربيات مش جاية نحيتنا هنا يا معلم .. دى ماشية
الناحية الثانية .

المعلم : ودا وقت نكت يا ابن العبيطة .

عسكري : مش بنكت يا معلم .

رضوان : انت أتخيلت يظهر فى عقلك .

الخوف هرش مخك يا ابن المرعوبة

عسكري : طب تعالى شوف بنفسك .

رضوان : (يبعد رضوان لأعلى وينظر) يا قوة الله العربيات مش
جاية نحيتنا .. دا رايحة ناحية قصر عابدين .

المصور : صحيح يا معلم رضوان ؟

رضوان : صحيح يا أستاذ .

٢٣٠ الاحتفال خلص بسرعة

المصور : يا سلام .. يبقى اللي فى بالى حصل يا معلم .. الساعة

(يدخل الى المسرح ضابط جيش صغير - السن برتية
صاغ ومعه جنديان من البوليس الحربى واتمامها الدكتور
عزیز ومأمور القسم) يهرع المعلم رضوان والمصور
لاستقبالهم - كاملة تنظر فى وجه الصاغ (تزغرد) .

كاملة : سى حمدى القومندان أهه يا معلم رضوان .. مش
هايهدوا ياسى حمدى ؟

حمدى : لا يا ست كاملة .. بيوتكو مش هاتنهد .. اللي هاينهد
بيوت تانية .

كاملة : ربنا يخليك لشبابك (تجرى نحو عزب) مش قلتك ..
صدقتنى بقى يا بتاع عبد السلام .

حمدى : يا معلم رضوان .. مصر فى لحظة من أخرج لحظات حياتها
النهاردة .. وربنا يسلم وكل شىء يبقى تمام انشاء الله ..
وأنا عاوزكم تساعدونى .

رضوان : احنا تحت أمرك ومن ايدك دى لايدك دى يا سعادة
البيه .

حمدى : احنا مش عاوزين دوشة فى الحتة وأنا بارجوك تصرف
الناس لبيوتها كل واحد يرجع لشغله .. عاوزين نشتمل
يا معلم علشان نبنى مصر .

رضوان : ما احنا كنا قاعدين فى حالنا وساكتين هما اللي جم ولاد
الهرمة .. قال ايه عاوزين يهدوا الحتة ويرمونا فى الشارع
ويعملوا التمثال قدام القصر

حمدى : الكلام دا انتهى خلاص يا معلم .

رضوان : ينصر دينك .. تعالى لما أبوسك والنبي .
(يتعانقان)

حمدى : انا كان نفسى أقعد معاكو كتير .. لكن انتو عارفين ..
النهاردة ورانا شغل كتير .

رضوان : الله يكون فى عونك ربنا معاك . وكل العالم دى معاك ..
رقبتى دى فداله .

- حمدي** : اتفضلوا .. انتو يا اساتذة كلكم مع السلامة .
- عزيز** : (يدخن بعصبية ويذهب على المسرح جيئة وزهايا) أنا ضد العنف .. أنا مع المناقشة ، لا بد من المناقشة لتوضيح وجهات النظر .
- ابو سريع** : والنبي تتهوى من هنا أحسن أخذك أحبسك فى بيت عبد الفتاح .
- عزيز** : ما فيش حل غير الفن الشعبى .. أنا لازم أعمل ملحمة الربيع الخالى .
- (يدخل جلال الى المسرح حاملا نسخة من عدد جريدة)
- جلال** : اللى قلناه اتحقق يا معلم .. ما فيش حل غير العنف .. العنف هو قاطرة التاريخ .
- كبارة** : الله يرحمه سعد باشا قال ما فيش فايده .
- عسكري** : عن اذنك يا معلم رضوان احنا مروحين بقى .
- رضوان** : خد انت وهو رايحين على فين ؟ خليكو واقفين معانا هنا .. البركة فينا كلنا
- عزيز** : مهرجان الفن الشعبى هو الحل الوحيد لاطهار عيوب المجتمع ..
- كاملة** : هنا ام كلثوم .. وهنا عبد السلام .
- جلال** : العبيد لا يخسرون شيئا الا الاغلال .
- عزيز** : عندما يقتل الانسان الضعيف انسانا اضعف لم يات شيئا مذكورا ولكن قيام فكرة عظيمة فى وجه فكرة اخرى عظيمة نظيرها امر يتشرح له قلب الله .
- المعلم** : صدق الله العظيم .
- (ينسدل الستار ببطيء بعد أن تعانق رضوان والصاغ حمدي قبل أن ينسدل الستار تماما يتحرك المصور خارجا من المسرح) .
- رضوان** : على فين يا استاذ .
- المصور** : والله منا عارف يا معلم .. لكن خير انشاء الله .
- (ستارة)

